



09972

明張煌言著

北征得失紀畧

余自乙酉倡大義於甬東距己亥十有五載矣其間栖山蹈海艱險備嘗俱無論猶憶丁亥歲持節監定西侯軍西征遭颶風覆舟陷口中七日得間行歸海上嗣後三入長江登金山掠瓜儀而師徒單弱迄鮮成績至戊戌追隨賜姓延平藩北伐抵羊山復遇風碎舟返旆踰年歲在己亥仲夏延平藩全軍北指以余練習江上形勢推余前驅抵崇明余謂延平崇沙乃江海門戶且懸洲可守不若先定之爲老營不聽既濟江議首取瓜步時口於金焦間以鐵索橫江夾岸置西洋大礮數百位欲遏我舟師延平屬余領袖水軍先陸師入余念國事敢愛軀命遂揚帆逆流而上次礮口風乾坤正氣集

卷五十五

一

息流迅舟不得前諸艘鱗次且進且卻兩岸礮聲如雷彈如雨諸艘或折檣或裂帆水軍之傷矢石者且骨飛肉舞也余叱舟人鼓棹入金山全艘數百艘得入者僅十七舟而本轄舟則十三噫危哉次早藩師始泊瓜城一鼓而殲滿漢諸軍殆盡乘勝克其城延平輒欲直取石頭余以潤州實長江門戶若不先下則口舟出沒主客之勢殊矣力贊濟師鐵甕而延平猶慮留都援騎可朝發而夕至也余謂何不遣舟師先擣觀音門則建業震動彼將自守不暇何暇分援他郡延平意悟卽屬余督水師往且以直達蕪湖爲約夫蕪湖固七省孔道商賈畢集居江楚下流爲江左鎖鑰重地况踰金陵歷采石懸軍深入此不可居之功也余一書生耳兵復單何能勝任雖然倡義之謂何顧入中原而不圖匡復也余何敢辭于時江湖縮朒水下如駛海舟行遲余易沙船牽挽而前未至

儀真五十里吏民賁版圖迎王師蓋彼都人士知余姓字有素故遮道來歸迨余抵儀先一夕延平已遣李將軍必單舸往撫余輒欲引去闔邑士民焚香長跪雨中固邀余登岸不獲已登江濱公署延見慰諭之衆以李將軍無兵恐口騎突至則無以捍牧圍咸稽顙留余保障余不可遂行鶴首所向遺民無不具瓣香相迎者而江濱小艇載果飯買易如織若不知有兵余顧而樂之以爲儼然王師氣象矣舟次六合得報藩師已于六月廿四日復潤州余計潤州旣下藩師繇陸逐北雖卒皆鐵鎧難疾趨日行三十里五日亦當達石頭城下卽作書致張茂之所號爲五軍者謂兵貴神速若從水道進師巨艦逆流遲拙非策余恐後期因晝夜牽纜士卒瑟瑟行蘆荻中兼程而進抵觀音門乃六月廿有八日也不意藩師竟從水道來故金陵得嚴爲之備余艤棹觀音門兩宿所統

乾坤正氣集

卷五百五十五

二

戰艦無一至者余乃發輕舟數十先上蕪湖而身爲殿泊浦口七月朔口偵我大軍尙遠遂發快船百餘載勁口侵晨出上新河順流而下擊棹如飛余左右不滿十舟且無風戰不利幾困忽一帆至則余轄下犁槽也余遽乘之復戰後餘續至口始遁去而日已曛矣詰旦整師前進口匿不復出余部曲馳報江浦已復蓋余方與口對壘也先一哨越浦口旁掠止七卒薄江城門口步騎百餘開北門遁而七卒遂繇南城門入亦一奇哉捷聞延平止余毋往蕪關而且扼浦口以撫江邑此七月初四日事也翼日延平大軍亦抵七星洲正商畧攻取建康而余所遣先往蕪湖諸將捷書至蕪城已復矣爾時上游聲靈丕振而留都守禦亦堅延平謂余蕪城又上游門戶倘留都不旦夕下則江楚之援日至非公不足辦此余謙讓至再延平但促余適發于是率本轄戈船以行而幕府

之謀自此不復與聞矣七夕抵蕪城傳檄諸郡邑江之南北相率來歸郡則太平寧國池州徽州縣則當塗蕪湖繁昌宣城寧國南陵太平旌德貴池銅陵東流建德青陽石埭涇縣巢縣含山舒城廬江高淳溧陽溧水建平州則廣德無爲以及和陽或招降或攻克凡得府四州三縣二十四焉先是余之拔蕪也兵不滿千舟不盈百惟以先聲相號召大義爲感乎騰書縉紳馳檄守令所過地方秋毫不犯有游兵闖入剽掠者余擒治如法以故遠邇壺漿恐後卽江楚魯衛豪雄多詣軍門受約束請歸禡旗相應余相度形勢一軍出溧陽以窺廣德一軍鎮池州以扼上流一軍據和陽以固采石一軍入寧國以逼新安而身往來宛陵姑熟間名爲駐師雄鎮而其實席不暇煖也余日夜部署諸軍正思直取九江然延平大軍圍石頭城者已半月初不聞發一僕姑射城中而鎮守潤

乾坤正氣集

卷吾五

三

州將帥亦未嘗出兵取旁邑如句容丹陽實南畿咽喉地向未扼塞故蘇松援口得長驅集石頭余聞之卽上書延平大畧謂頓兵堅城師老易生他變卽宜分遣諸帥盡取畿輔諸郡若留都出兵他援我可以邀擊殲之否則不過自守耳俟四面克復方以全力注之彼直檻羊奔獸也無何石頭師挫緣士卒釋兵而嬉樵蘇四出營壘爲空口諜知用輕騎襲破前屯延平倉猝移帳質明軍竈未就口傾城出戰兵無鬪志竟大敗時余在寧國府受降報至遽返蕪邑時七月廿九日矣初意石頭師卽偶挫未必遽登舟卽登舟未必遽揚帆卽揚帆必且據守鎮江余故彈壓上游不少動而口酋郎廷佐哈哈木管效忠等遺書相招余峻詞答之太平守將叛降於口余又遣兵復取太平生擒叛將伏誅然江中口舟密布上下音信阻絕余遣僧賈帛書繇間道訪延平行營書云兵家

勝負何常今日所恃者民心耳况上游諸郡邑俱爲我守若能益百艘來助天下事尙可爲也倘遽舍之而去如百萬生靈何詎料延平不但離石頭去且棄鐵甕城行矣留都諸口始專意于余百計截余歸路以爲余不死必就縛各將士始稍稍色變然刁斗猶肅然余初欲據城邑與口格鬪存亡共之復念援絕勢孤終不能守則口必屠城余名則成于士民何辜而轄下將士家屬俱在舟擬沈舟破釜旣難疾馳欲沖突出江池州守兵又調未集忽謀報楚來口艘千餘已渡安慶余慮其與口值衆寡弗敵因部勒全軍指上流次繁昌舊縣池兵亦至其議進止咸言石頭師卽挫江楚尙未聞也我以濛矓徑趣鄱陽號召勇義何不可者若江西畧定回舟再取四郡發蒙振落耳乃决計西上初七日久銅陵海舟與江船參錯而行未免先後失序余一軍將抵烏沙夾而後隊尙維

乾坤正氣集

卷五十五

四

三山所云楚來口船果相值余橫流奮擊沈其四舟溺死口無算以天暮各停夜半口艘遁往下流砲聲轟然轄下官兵諛謂刼營起帆解纜一時驚散或有轉蕪關者或有入焦湖者西江之役已成畫餅矣余進退維谷遂沈巨艦于江中易沙舸繇小港至無爲州擬走焦湖聚散亡爲再舉計適英霍山義士來遮路言焦湖入冬水涸未可停舟不若入英霍山寨可持久余然之因盡焚舟提師登岸至桐城之黃金朔有安慶口兵駐守此地乃入山關隘余選驍騎馳擊之奪馬數十殺口殆盡遂繇奇嶺進山一望皆危峰峭壁矣余轄下甲士素不山行行數日皆重繭且多攜眷挈輜日行三十里余嚴令焚棄輜重而甲士涉遠多罷余雖知必有長坂之敗而赴義之衆何忍棄置亦按轡徐行八月十七日已入霍山界去縣治僅七十里而遙而所稱陽山寨者直咫尺間耳寨在山

巔可容萬人饒水泉向多義旅近爲□招撫有一稽良輔者亦義帥受□符據寨中先以書往通欲借寨屯衆而彼中已聞石頭師挫有向背心堅不納然寨路險萬夫莫能仰攻余遂移扎東溪嶺思走英山將軍寨但將士疲甚偶語沙中俱以途窮爲憂余強起按行占一數四課俱空陷余大驚因申令詰朝早發余率騎兵前驅但慮前有敵人而豈意追騎之躡其後哉余方踰嶺後軍報□奄至忽回馬而旗靡轍亂士卒皆竄山谷中□騎已當面矣余顧左右止二十餘騎步卒不滿百因勒馬高坡以待後軍稍集而擊之詎後軍已爲截斷首尾不能相顧矣□騎漸合余念鬪死無名單騎突圍走止一僮攜印相隨焉嗟乎余之入山非避死也尙圖控連江楚收河南北之大俠雲擾中原天下事未可知也奈何孤軍無援鼓聲不振卒以潰敗東溪之不爲笄坑者幾希天耶人耶

乾坤正氣集

卷五十五

五

余去敵稍遠而土人利散兵財皆手挾烏銃游奕四山余牙門將跳而復返與余值呼之偕行三人紆回山岡間迷入道土人在山麓者覘知卽趣至山椒阻去路余出百金爲壽土人卽匿余山卡期以日暮導余出余三人始變服而余將泣數行下惟恐土人之叵測也余曰死固我分也藉土人叵測吾當明言姓字令昇至建康從容就義耳不然者脫虎穴矣是蓋有命焉及酉土人果復來裏脫粟相餉食畢乘月西行一夜走七十里皆羊腸鳥道崎嶇特甚始余在馬上著靴後舍騎而徒偶得雙舄納之實不容足中啻涉水履益加窄迨曉十指見血踵盡裂余尙踴躍奔趨腹且餒乃望門投止謀朝炊主人問所從來導者荅余爲館師余將則貢客也皆以兵聲避去而導爲之送往因具盤食余爲進一七復行適余散兵十數遇諸途見余驚喜欲相勞苦而導者恐耳目太駭遂

疾走余恐迷失道亦躡導疾走村中豪傑觀者如堵競前遮問蓋村中惟聞余兵入山風鶴聲甚見蹶者趨者必謂兵之隨其後也故執途之人而問之導者見村中之遮余必謂事露計不反顧并余被襍亦負之而趨回顧余之將與僮尙鵠立隔溪余旣失道復失導不得不反就將與僮步履倉皇鄉音復異村中心疑余爲□卒敗遁益環擁索金錢余恐村中或有他意亦姑妄應之且傾所有分贈諸人始稍稍解去余視其中貌厚者俾之導行強而後可其人姓胡昆季三貌厚者其伯氏也時余但欲得出山達康莊他不遑計是日又行三十里托宿焉逆旅主人胡族屬也忽胡之季亦至招其兄出耳語俄而主人咸出余意其識余行踪必行甘心於余然亦無可奈何胡卻入語余曰君自海上來非□卒也余曰然爾何從知之然則奈何胡曰君適在村中不有十許人過我門

乾坤正氣集

卷五十五

六

乎避兩旁舍子季問之知君亦海上人也恐吾導不力所以來耳然胡終不知余爲何許人也胡之老人重具雞黍爲余言此中豪傑向年亦舉義旌卒不成受□殘虐故今莫敢有跬左足而動者不料此番石頭師挫君輩又敗績吾儕不復觀漢官威儀矣嗟嘆久之復前要盟余易姓名里居相告兼謀所向僉云當從安慶渡江當余之離安慶而趣上江也余舊時所從歛人朱君來謁叩其近狀云變姓名賣藥於安慶之高河埠市中仍欲從余戎行余謂事已裂矣此行利鈍未卜贈以金塵之使去至是余憶前語遂令胡導至高河埠而胡亦云導至高河能事畢矣余益不得不訪朱君而問道焉信宿達高河埠已薄暮余令導與童子先之問朱君藥室所在詎朱君別余後他往尙未返高河市人見童子之問朱君也覺有異羣踪跡之市中豪徐某金某皆歛產與朱君善偶從

橋畔聞童子之問朱君市人之踪跡童子亦覺有異竟以數語解散市人故余得無恙然朱君未返無居停主轉授逆旅逆旅老嫗亦歛人聞余爲朱君來改正宿余而胡之導余者將於次早別余歸余俛俛無所問津益無賴晨興忽憶安慶向有賣稻船往來江南北必取道樅陽湖而高河之去樅陽一水可通遂令胡代余覓便帆將渡江出池州登九華山徐圖歸計買舟既定舟人相期亭午鼓棹余故暫止逆旅而徐某金某自外入與余聯坐問余何來余告以館穀歸江南便道訪朱君逆旅中無賴子遂詰余訪朱君何爲者余亦謬對而金與徐素昧平生語言時陰左右余且目余起余起金引入空舍中問曰君得無姓張乎余詭曰吳姓金曰不然日者吾同朱某來江上從鄰兒窺見丰采君固司馬公也業提師入山矣何以至是將何之蓋金同朱至江上余方作焚舟計事

旁午金無從晉謁而朱別去金亦踉蹌歸以故朱與余交誼金稔知之而金與朱行踪徐所熟聞也先一日余過市金固疑之與徐謀曰茲二客之訪朱君得非山中使者乎盍往物色焉故是晚之解市人及是晨之過逆旅殆有天幸及見余徐不識也金識之余亦不諱告以故金轉告徐徐曰江上未解嚴誰能爲蘆中丈人者儻疎虞可若何固要余至其家匿之始通姓名備道夜來事如此二君其誠有心人也適安慶□兵經高河士民畏□如虎盡室避村野余不得已亦相隨避兵至一何姓家亦金徐密友也翼日□去金徐另買賣稻舟藏余舟次令何某伴余繇樅陽出江渡黃溢抵張家灘登岸而金與徐別從安慶來相會於張家灘張家灘屬池之東流徐之兄賣藥其村中故問津焉于是繇建德祠門兩山中走休寧羊腸鳥道較霍山尤甚余復病瘧扶疾而行頭涔涔汗

下如雨形容枯槁幾作溝中瘠矣東建延袤高山多小寇出沒或乘夜剽掠土人相聚持兵守嶺頭凡過客皆權金名爲禦寇實爲寇也余冒險奔馳道路以目將次祁門江右義旅陳九思屯朱橋村舍逋逃商旅裹足獨余行行不止人多怪之賴導者皆歛人得無他慮計兩日可抵休邑買棹溪行即可達嚴陵未至休邑三舍輒聞有兵阻抵郭外果蜂屯蟻聚闔盡閉蓋□之叛將新復歸□爲長吏慮有變登俾余緣是不得入止郭外招提戢羽潛鱗雖子胥吹篪不是過也而耳目漸集乘間抵城中寓徐之諸父家其諸父善岐黃有隱君子風余至盛爲治具然亦謂余館師與其猶子交蓋不知爲余也兵退買棹嚴陵過新安亭長呵止之索篙師金始放行達街口有巡司解邏卒登舟譏察見余將北音貌魁梧疑爲亡□持之急徐起而與邏者鬪而巡司適之郡不在解是以

乾坤正氣集

卷五百五五

八

事得解解維至淳安已入浙矣會省有文符捉民艇載兵絕浮梁余船藏他港不獲免竟爲所司捉去行路難一至是哉余乃紆道走瑞安凡兩買棹纔達嚴郡余旣入浙晦跡益難計惟有山行方可無恐乃自婺之東義出天台以赴海壖然鳥道羊腸較嶽更甚時余將已令取道于杭而金徐諸人皆不諳浙道里向者導導余而茲則余導導然余實茫然問塗已經得至海濱濱海居人咸來問訊遠邇聞然知余得生還矣回思霍山奔亡以來之安慶之池之徽之嚴之江浦之東義之天台寧海計程二千餘里間關百折何其窮也復回思自崇明進師而瓜步而潤江而和陽而太平而寧國而池而徽而廬之諸州邑乘勝長驅抑又何壯也然而轉瞬成敗異勢勞辱殊形是又戲也夢也余自丁亥迄己亥前後入江皆歲在雙魚而一再躡疑若有數焉然以十五載之揣摩簡練旣

得而復失之人壽幾何河清難俟不亦重可慨也夫己亥嘉平月  
紀于浙海行營

復郎廷佐書

己亥

某復書於皇明遼陽世胄郎使君執事前夫揣摹利鈍指畫興衰  
庸人聽之或爲變色而忠貞之士則不然其所爭者天經地義所  
圖者國恤家仇所期者豪傑事功聖賢學問以故擅雪自甘膽薪  
彌厲而卒以成功古今來不可勝計如僕者將畧原非所長祇以  
讀書知大義痛忿□□左袒一呼甲盾山立區區之心以濟則賴  
君之靈不濟則全臣之節是以不惜憑履風濤之中縱橫鋒鏑之  
下迄今逾一紀矣同仇益廣晚節愈堅練兵澗宇正爲乘時今何  
時乎兩越天聲三楚露布以至八閩軍書何啻雷霆飛翰况島□  
外証番落內畔□人左支右吾其消滅可計日而待矣僕當起而  
乾坤正氣集

卷五十五

九

匡扶帝室克復神州此正忠臣義士得志之秋也卽或不然而謝  
良平竹帛抗黃綺衣冠亦之死靡佗豈煩詞曲說足以動其心哉  
乃執事儼然以書通以僕亦庸庸者流可以利鈍興衰動者譬之  
虎張戒途雁奴同夜旣受其役竟忘其哀在執事固無足怪而僕  
聞之髮且衝冠矣執事固我朝勛舊之裔而遼左死事之孤也念  
祖宗之厚澤宜何如悲傷痛父母之深仇宜何如報雪稍轉一關  
不失中興人物顧以陵律自居華□莫辨甚爲執事不取也姑以  
執事恩仇之說言之如遼左起而征調始繁催科益急以故潰卒  
散而爲盜竊民聚而弄兵是釀成寇禍者□人也及京華失守屬  
國典師誠能挈故物而還之天朝將吐蕃回紇不足稱美于前乃  
拒虎進狼旣收漁人之利於河北而長蛇封豕復肆蠱蠱之毒于  
江南則□人將恩乎仇乎執事亦可憬然自悟矣以來函溫潤諒

執事非憤憤者聊附數行以復若斬使焚書適足見我不廣僕亦不爲也此復

### 答趙廷臣書

台翰儼頒殊深內訟豈僕一片愚忠尙未足取信于天下耶台下清朝佐命僕則明室孤臣時地不同志趣亦異功名富貴早等之浮雲成敗利鈍且聽之天命寧爲文文山不爲許仲平若爲劉處士何不爲陸丞相乎倘云桑梓塗炭實爲僕未解兵僕亦何難斂師而去但未知台下終能保障否乎區區之誠言盡于此間使說詞請從此絕

### 答趙安撫書

一作答王紹撫光祿書

不佞明室孤臣也有死無貳與執事非有同朝之雅義無外交何必復通竿牘但天理民彝及不佞生平不可不正告天下故勒書

乾坤正氣集

卷五十五

十

附使者以報竊觀古今來何代無廢興其興也天啟其機其廢也人基之謀或興而復廢或廢而復興然有志之士尙謂人定可以勝天彼漢阨十八年而光武重昌夏亡四十載而少康復祀蓋不特覆楚復楚事在俄頃間也卽使歷運推移朝市遷變興王每每賓禮勝國君臣錄用前朝宗室不但開基忠厚卽爲享國長久之符亦將使忠臣義士戴新朝之盛德慰故國之悲思且其當鼎革之際軫念瘡痍莫不省刑薄斂偃武修文與天下更始所以四澗謳歌祥雉歸命其間雖有疾風勁草不以盛衰改節不以成敗易心者無非欲爲萬古留綱常爲兩間存正氣英君察相尙能畧其迹而原其心感其誠而哀其遇故漢高以封雍齒蜀主以禮劉巴唐太宗有堯君素之旌而我太祖有余闕福壽之祠祭其或不忠所事縱歸附獨先必擯斥恐後如丁公可誅危素可謫前軌昭然

豈好爲顛倒哉帝王大度原欲扶名義以培風教故也今則不然夫昔日之北庭非本朝之屬國乎建州之甲已忘休屠之恩矣遼左之烽胡爲乎北平之旗似同回紇之義矣南牧之馬又胡爲乎舊都嗣服正朔相承冠蓋方達于薊門鼓鼙已震于吳會自是蠶食東南不遺餘力凡我天潢雖在遜荒靡弗芟薙夫以高皇帝駿德鴻功使其子孫禍酷徽欽祀荒祀宋宜人心之不服者一也從來更姓改物皆因處置得宜然後人情豫附今不過宋室之逼臣而稱爲僞命無非晉家之遺老而被以惡名甚至一人抗節而逮及一家一姓守義而株連他姓遂使抱慙懷忠不忍逃雨卽欲埋名變姓亦恥趨風而喪師辱國者卒秩以三公鬻主求榮者反爵以五等是以不忠不孝令也開國規模固如是乎宜人心之不服者二也邇來□□初無招攜懷遠之誠止有納叛招亡之術或使

克坤正氣集

卷五百五

十一

同輩操戈或令下人棄甲此豈足以訓型天下而奸詐之徒以爲仕宦捷徑往往私鑄印符僞刊牌劄以覬壟斷之功名當事明知其然亦陽爲網羅陰行羈縻以冒招來之功績不知黃綺衣冠必不輕出商山夷齊薇蕨豈肯頓易周粟宜人心之不服者三也若以近事而論濱海遺民旣苦朝秦而暮楚乃安邊勝策惟聞竭澤而焚林俾百萬生靈棄田園毀廬舍捐墳墓而又不知所以安插之蜚鴻滿道碩鼠興嗟將以爲清野耶而野未必清將以堅壁耶而壁未必堅豈我旌麾甲盾果繇蜀道遷人抑彼網罟牢盆亦是新豐鉅族乎名爲息黥補劓實則救療助薪宜人心之不服者四也他若征求無藝殺戮非辜選將遷官先論賄賂登賢籲俊亦藉苞苴僨師掩敗以飾功驕兵宣淫而肆掠兼之毀裂冠裳崩壞禮樂蓋不待智者而知□運之不長矣如謂今日域中幅幘盡入版

圖華□庶幾一統獨不見強秦方啟霸圖何竟亡之二世暴隋既成王業亦遂失於再傳况賴宗廟社稷之靈吾國已自有君行當迎楚昭于雲夢奉齊襄于莒城又何煩執事之恫疑虛喝哉至于不佞本末固可得而言矣不佞夙承先學謬獵時名自遭國難輒棄家緣始則聲大義于江東既而抱孤忠于海曲自分戴髮含齒之倫幸南國尙同左袒倘論踐土食毛之誼于北朝原等風牛矧豫讓淡身其妻不識張良破產惟敵是求而有司不察藉我田宅矣未幾囚我妻孥矣用是依墻乞援淚盡申胥啓冶鑄兵誓深祖逃然志匡王室豈恃兵威念切神州尤憐民瘼如長江之役樵蘇不驚市肆靡易凡縉紳之家韜鈴之族効力□人者槩無誅求以示寬厚諒執事之所知也及同仇挫衄不佞遂問道言旋彼時豈不能提數千勁卒以震盪中原據數十名城以號召天下正慮鋒

乾坤正氣集

卷五百五十五

七

鏑橫及無辜是以旌旗不妨左次何意泰運將開屯期尙篤枕戈待旦又歷歲時但三戶亡秦讖繹已兆一成祀夏歷數有徵不佞方以孤臣皂帽待真主黃衣安所事解甲投戈俛首屈膝者哉卽或赤符未歸暫作隆中之臥黃石已遇猶從圯上之游則爲龍爲蛇不佞進退固有餘裕矣雖然不佞之所以百折不回者上則欲匡扶宗社下則欲保捍桑梓因國事之靡寧致民生之愈蹙十餘年間浙閩郡邑芻蕘燠糧之供樓櫓舟航之費可謂百孔千瘡敲骨吸髓而曾不得鋒銷燧息波靜湖平執事亦可惕然矣尙復重之遷徙貽以流離哀我人斯汙可勞止今執事旣銜命而來以保境息民爲意則莫若盡復濱海之民卽以濱海之賦畀我海上之師在□人旣能開誠布公捐棄地以收人心在海上亦何惜講信修睦且休兵以待天命不佞與執事輩從容羊陸之交往來僑胙

之好既省整堡守望之戍并免舟楫營繕之需藉我外兵以備他盜因而煎熬則鹵鹽可行矣因而採捕則魚鮮可給矣因而買遷則商賈可通矣匪直暫解兵爭亦以稍甦民困是珠崖雖棄休息宜然朝鮮自存艱貞斯在特恐執事畏耳畏則無成也又恐執事疑耳疑則又無成也不佞何心必欲因此一方民哉則請與執事約但使殘黎朝還故里則不佞卽當夕挂高帆十洲三島莫非生聚教訓之區嘗膽臥薪別有扶危定傾之計則臣靡尙在天意未忘禹功諸葛猶存正統還歸漢胄惟執事圖之

復田提督張鎮王道書 此第一次回書

竊聞兩間自有正氣萬古自有綱常忠臣義士惟獨行其是而已不孝一介書生遭逢國難初學士雅匡世久同去病忘家忠孝已難兩全華口豈堪雜處區區此志百折彌堅不過以恪守人倫卽乾坤正氣集

卷五百五

三

是深明天道綱維足下或爲本朝專閫或爲昭代魏科今雖逢場作戲而河山之感諒彼此同之近窺象緯口運業窮于九必有起而驅除者爲足下計拔趙幟立漢幟蔡人卽我人微但大樹勳名不得專美于前而梁公夾日行當再見尙有何嫌何疑而以不入耳之言來相告也新莽僭號河北群盜皆以興復漢室爲名今日山中義師大率類此故足下亦得以折簡招之不孝本來面目何如亦欲以此術相籠絡誤矣昔王景畧告苻堅曰江南正朔相承願勿以爲意是真識時之語淝水之役堅不能聽而果敗秦亦隨之以亡是可爲明鑒今日之域中存亡正未可必抑未聞秦未始亡楚未始存之說乎况水陸自有長技戰守早有定謀縱足下輩以全力來勝敗未可知也總之大明無不中興之理非晉元宋高可比我輩相晤正自有期不孝未便以支山自况足下正不必以

夢炎輩自居耳

貽趙廷臣書

浙江總督此甲辰秋被繫杭州時書也

大明遺臣某謹拜書於清朝開府趙老先生臺前昔宋臣謝枋得有云大元制世民物維新宋室孤臣只欠一死竊以疊山業經市隱賣卜宜可以遠害全身而元叅政魏天祐必欲招致之乃疊山有死無隕招之不來餽之不受卻聘書尚在可考而知也卒觸天祐之怒執之北去疊山遂不食而死蓋未嘗不歎古人守義之堅殉節之篤也况某今日南冠而繫視疊山所處已自不同而臺下尙欲貸其餘生屢遣貴屬存注有加勸之加餐嗟乎此固臺下褒忠錄節之盛心較之天祐真不啻霄壤顧某自律斷不可因此而苟延旦夕也所以每思慷慨引決而爲館伴者防閑嚴切不克自裁絕餐三日迫於貴屬勦勉稍稍復食他人間之寧不以某寡廉

乾坤正氣集

卷五十五

十四

鮮恥晚節可嗤哉揣臺下之意不過欲生膏斧鑕始足爲忠義者戒然大丈夫冰視鼎鑊慷慨從容原無二義故鬱鬱居此耳猶記去歲華函見及某之報書有寧爲文山之語非但前識蓋齋心居念時已早辦此至今日敢有食言夫自古廢興亦屢矣廢興之際何代無忠臣義士何代無通臣處士義所當死死賢於生義所當生賢於死蓋有舍生以取義者焉未聞求生以害仁者也某之憂患已過乎文山隱遯殆幾于疊山矣而被執以來視死如歸非好死而惡生也亦謂得從文山疊山異代同遊于事畢矣獨惜臺下之經綸仁厚可稱一代名賢後世不察猥云與張宏範魏天祐比倫不重可歎息乎哉謂某散兵在先歸隱恐後可以覬覦賒死殊不知散兵者憫斯民之塗炭歸隱者念先世之暴荒謬思黃冠故里負土成墳然後一死以明初志原非隱忍偷生自留賒死何

期擁兵則歲月猶存解甲則旦夕莫保箕山不有安瓢而潁水弗能高枕身爲纍囚貽笑天下是某之忠孝兩虧死難塞責者矣臨難苟免非我本懷偷存視息更何所待今羈留旅邸被累質從並膺鑕鍊以日爲年生不如死伏冀臺下立賜處決俾某乘風馭氣翱翔碧落或爲明神或爲厲鬼是誠臺下大有造子某也不則某當追隨首陽之後塵必不俟炎午之生祭母以館伴者不善調制而謹及之幸甚

乾坤正氣集

卷五十五

五

張閣學文集卷二

明張煌言著

涇縣潘錫恩校

上監國啟

竊臣萬里孤踪一軍特立違越潛邸屢易星霜雖傾日有心而瞻雲無路又懼旁疑他如未敢輕達封章己亥夏於東甌晤錦衣指揮陳貴曾附䟽轉達豈意陳貴隨滕北上後因南師挫衄流落江上聞今已往山東矣若臣自入長江先驅直奪鎮江磯口卽復孤提木轄船兵深入上游傳檄而下徽寧池太四郡和州無爲州及招降溧水溧陽高淳建平廬江巢縣舒城含山諸邑通計得江南北府州縣三十餘城遂駐扎蕪湖且撫且恢水陸兵至萬餘豈意延平藩師潰于金陵倉卒南渡臣之孤軍竟陷重地口曾百計阻絕歸路貽書招誘臣遂焚舟登陸思入英霍山寨以圖震動中原乾坤正氣集

卷五十六

一

提三千餘衆與口轉戰千里相持二十七日屢有斬獲楚豫之間蠢蠢欲應終以勢孤援絕士卒罷倦而敗臣單騎突陣竄伏山谷中繇間道徒步二千餘里賴義士扶衛始得生還海上皆賴主上之福蔭也然志猶未已力圖收燼以冀桑榆之效幸而散亡漸集正在整槩俟時而動奈囊空釜罄力不如心茲伏延平王同仇誼篤分地給兵或可望後效于將來耳其如口警頻仍窺伺日迫儻浙游決不可支亦當南帆一覲睿顏也昨差官自思明州回知主上移蹕金門之信當此漢阨未回卽遵時養晦尙無其地是臣所爲日夕傍徨者也臣垂翅之餘百事艱難芹曝之獻容俟後期竊有錦衣張士魁楊澄亦經患難俱得生還現在臣營合并具報茲因便帆具啟上候睿安臣不勝惶悚瞻依之至

上延平王書

竊聞舉大事者先在人和立大業者尤在地利故晉武以獨斷而平吳然苻堅又以獨斷而敗于晉尉佗以僻處而據越然劉禪又以僻處而亡于魏則人和地利審之不可不精也卽如殿下東都之役豈誠謂外島足以創業開基不過欲安插文武將吏家室免使內顧庶得專意恢勦但自古未聞以輜重眷屬置之外夷而後經營中原者所以識者危之或者謂女真亦起于沙漠我何不可起于島嶼不知口原生長窮荒入我中土如適樂郊悅以犯難人忘其死若以中國師徒委之波濤浩渺之中拘之風土狂獠之地眞乃入于幽谷其間感離恨別思歸苦窮種種情懷皆足以墮士氣而損軍威况欲其用命于矢石改業于耨鋤何可得也故當興師之始兵情將意先多疑畏茲厯暑徂寒彈丸之城攻圍未下是無他人和乖而地利失宜也語云與衆同欲者罔不興與衆異欲

乾坤正氣集

卷五十五

二

者罔不敗誠哉是言也今口口短折孤雛新立所云主少國疑者此其時矣口口黨分權離畔疊告所云將驕兵懦者又其時矣且災異非常征科繁急所云天怒人怒者又其時矣兼之口勢已居強弩之末畏澠如虎不得已而遷徙沿海爲堅壁清野之計致萬姓棄田園焚廬舍宵啼路處蠢蠢思動望王師何異飢渴我若稍爲激發此竝起亡秦之候也惜乎殿下東征各汛守兵力綿難恃然且東避西移不從僞令則民情亦大可見矣殿下誠能因將士之思歸乘士民之思亂迴旗北指百萬雄師可得百什名城可收矣又何必與紅夷較雌雄于海外哉况大明之倚重殿下者以殿下之能雪恥復仇也區區臺灣何預于神州赤縣而暴師半載使壯士塗肝腦于火輪宿將碎肢體于沙磧生旣非智死亦非忠亦大可惜矣况普天之下止思明州一塊乾淨土四澗所屬望萬代所

瞻仰者何啻桐江一絲繫漢九鼎故口之虎視非朝伊夕而今守禦單弱兼聞紅夷搆口乞師萬一乘虛窺伺勝負未可知也夫思明者根柢也臺灣者枝葉也無思明是無根柢矣能有枝葉乎此時進退失據噬臍何及古人云寧進一寸死毋退一尺生使殿下奄有臺灣亦不免爲退步孰若早返思明別圖所以進步哉昔年長江之師雖敗猶榮已足流芳百世若捲土重來豈直汾陽臨淮不足專美卽錢鏐實融亦不足竝駕矣倘尋徐福之行踪思盧敖之故跡縱偷安一時必貽譏千古卽觀史載陳宜中張世傑兩人褒貶可爲明鑑九仍一簣殿下寧不自愛乎夫虬髯一劇祇是傳奇濫說豈真有扶餘足王乎若箕子之居朝鮮又非可以語于今日也某倡義破家以來恨才力薄不能滅口恢明所仗殿下憤爲雄俾日月幽而復明山河毀而復完某得全髮歸故里于願乾坤正氣集

卷五白平六

三

足矣乃殿下挾有爲之資值可爲之勢而所爲若是則某將何所依倚故不敢緘口結舌坐觀勝敗然詞多激切觸冒威嚴罔知忌諱罪實難追惟願殿下俯垂鑒納有利於國某亦死無所恨謹啟

上魯國主啟

爲國難已極天命宜還乞早定大計以存正統以圖中興事春來閱邸抄知去年十一月緬夷內變導口入緬致我主上蒙塵一時扈從宗室官員無一得免惟吉王自縊以殉而晉藩入澠臣聞變之日肝腸寸裂猶謂狡口詐傳疑信相半及四月中旬聞駕竟從鎮江北轅矣思惟我太祖高皇帝聖德神功豈意後王禍等徽欽辱同懷愍或者剝極而復天意有歸故口亦厚其毒而速之亡也但中華正統豈可久虛只今口亦以諸夏無君徧張僞檄熒惑觀聽四顧敷天止澗上尙畱左袒臣以爲延平藩必當速定大計以

申大義亟誓大師以報大讐而至今寂寂道路謠傳又有子弄父兵之事臣中夜傍徨竊恐孤島孤軍難以持久况復加以他故譬疍羸之夫胸胃轉增雜病其能久乎只今口遣使招撫于澗閩廣每省二人以解散海上若不及早經營則報韓之士氣漸衰思漢之人情將輟臣惟有致命遂志以了生平獨所倦倦者主上羈旅孤島不但與閩人休戚相關亦且與閩澣存亡相倚萬一變生肘腋進無可依退無所往有不忍言者矣既恨臣力太綿不敢輕爲迎駕復顧臣心獨苦又不敢輒行趨扈計惟在閩請勳鎮正在危疑之際不若急用收羅之術以爲擁衛之資然後速正大號使天下曉然知本朝尙有真主中國自有正朔在屯之言建侯在渙之言享帝正此義也于是傳檄省直刻期出師雖強弱懸殊利鈍莫必而聲靈宣布響應可期倘皇天未忘明德則興滅繼絕端在主

乾坤正氣集

卷五辛六

四

上此非欲邀福也免禍亦宜然卽未服雪恥也圖存亦宜然臣今擬上詔書一道伏祈主上密與寧靖王及諸縉紳謀之發憤爲雄以慰遐邇臣不勝激切翹望之至

又壬寅

啟八月十五日御史臣陳修返命嘗具疏附奏總以去冬緬甸之變君亡臣死天下已無宋室矣止海上猶存一綫而主上尙在龍潛眞乃天畱碩果自當誓師討賊以維繫人心以嗣續正統昔莽移漢鼎光武興師不廢山陽昭烈踐祚懷愍北狩晉元稱制徽欽蒙塵宋高繼立以視今日誰曰不然顧島上勳賢罔識春秋大義而臣實兵微將寡餉匱糧窮孤掌難鳴既見宗國之亡而不能救猶幸舊主之在而不能扶所以中夜椎心淚盡而繼之以血也尙望諸縉紳或能旋乾轉坤臣已在厲兵秣馬但得南國首爲推戴

臣敢勿協力扈從伏惟主上潛算雄圖以凝景命茲恭進膳銀少杼葵藿特具本差官沓獻臣不勝激切惶悚之至

又壬寅

本月初八日御史臣陳修捧繪音至臣營臣焚香開讀知主上薪膽憂危較昔倍甚臣南望倉皇罔知所措獨念臣違顏以來忽經十載百折千磨壯心未已原非動念勲名特以越國義旅魯邸侍從止臣一人尚在軍次雖乖哭庭之義尙圖埽境之功苟良會可乘則迎鑾豈遠大命克集則奠鼎非難向以皇上當陽故謳歌有待且以主上養晦故潛躍宜權臣何敢妄思推戴以啟猜疑區區此誠銘之幽腑何期行闕游染口氛攀髯莫逮而延平王忽捐賓館秉鉞無人論國勢疑興漢益難察人心幸尊周轉切近來口中亦喧傳主上親征北上故臣于七月終具有密疏專官馳奏茲奉乾坤正氣集

卷五百五十六

五

異命渙頒倍增感奮但臣以孤軍子處荒壤口艘星列五倍于臣而臣又無蟻子之援臣日夜枕戈與死爲鄰亦以死自誓若輕爲移蹕則風鶴頻驚臣罪誰委倘仍棲滄島旣恐號召不遠復與臣呼應不靈伏乞主上與諸縉紳勲鎮熟籌妙策或揚帆海上或保據沙關結納忠義聯合勲爵俟羽翼已成然後旌旗四出仍乞欽鏐韜光以絕敵人窺伺臣亦得趨觀睿顏稍將芹曝臣猶慮魏絳之策得行則華口錯雜尤宜戒備不虞主上必得勁旅數千鉅艦近百常相擁衛方爲萬全鷺門牙囊纍纍相望就中豈無耿弇其人伏乞主上并覽前疏深思臣言臣愚幸甚

賀延平王啟

伏以秉鉞仗旄蒼姬崇呂周之典分茅錫土皇唐重郭李之勲况績茂中興則禮優同姓當茲王封之肇啟允爲仕籍之咸歡恭惟

殿下三台捧日一柱擎天運掌上之奇謀星飛電繞倡寰中之大義海沸山奔系屬籍而演天潢不數徐勣之在唐婁敬之在漢收版圖以還帝室何殊岐陽之征北黔寧之征南比者北極遠念奇庸東朝新膺殊禮金符銀冊等適公侯旅矢彤弓寄專征伐在耿弁畧定北道不過典畀屏藩卽寶融保據西州未聞榮超蒲穀是惟樹不世之勳猷所以受非常之名位際斯盛事洵足誇揚某一介書生十年義旅會稽甲盾已愧種蠡之徒棲江左衣冠每托桓文之後乘敢言助籌帷實望受蔭帡幪伏願威揚四裔烈炳千秋賜履增璜遠表東海之碣建邦啟宇先消南國之氛庶幾挽日月以重明而某亦得附風雲而益顯矣

答閩南縉紳公書

乾坤正氣集

卷五十六

六

候牘久虛踈節殊甚不肖以孤軍扼上游日望天南好音以爲馨符英銳已出臨戎元勳舊德同心夾輔不佞鷺門有磐石之固而長驅迅掃直旦暮間事又不覺悲喜交集日來浙直老穉喧傳鶩左勳鎮紳衿復奉魯王監國正在疑信間及接老先生公函諄諄以魯國王玉食爲商猶憶壬辰之春不肖同定西公扈從南下蒙延平殿下誼篤瓜瓞慨然安置則不肖輩之擔已卸矣今不幸延平殿下薨逝大喪未畢繁費難支卽軍儲尙恐不給何暇言及宗祿旁觀者豈不諒當事苦心若不肖梁園舊從敢愛方物之獻但南北相距動輒數千里近來賊哨出沒孤艇難行安得時時供億再四躊躇倘國主能豁光晦迹移寓海上或沙關之間則不肖尙可稍將芹曝而浯島亦免窺伺之虞否則鞭長弗及雖智者亦難爲計矣然我輩所爲何事而致親藩流離瑣尾飢餓於我土地非

特諸勲貴之責亦諸老先生之羞也若新府肯敬承先志敦重天潢哀王孫而進食又何煩不肖之芹芹寸曝哉惟老先生裁察之

答延平長子書

不肖以王人之微重荷先王殿下客卿之禮圖報未遑昨知肇基東土正擬躬執鞭弭稍効微勞差員南返捧執訃音震動魂魄毋論國恥家仇尙稽報雪而五侯九伯誰爲指麾在不肖空瞻帷幄似失咻嚵更不禁淚之滂滂下也幸而老世臺丕承前業壁壘增新昔禽父在喪專征誓衆伯符英銳遂霸江東以視今日豈異人任不肖托在同仇待罪軍旅夙仰仲謀之器今聞亞子之風自當竭此孤忠報茲舊誼但荒汎孤軍當上游勁敵伏望提攜庶聯聲援倘口謀叵測尙圖溯洄南下求一枝于萬厦安插兵衆則奉令承教諒亦匪遙恭聞纘緒撫軍不勝雀躍緣在大喪未敢稱賀統

乾坤正氣集 卷五百五十六

七

祈崇照可任瞻依

復盧牧舟司馬書

十餘年來南北鱗羽往來如織每于老祖臺曠焉問問豈其踈節知老祖臺方在却掃筭常寒暄不足以塵典籤也近聞蒼梧不返炎鼎幾燼而飛熊星隕適與輻奏國瘁人亡何能無淚今口實徧布楚歌熒惑觀聽正恐成紀茂陵今亦不可復得自非乃心王室以伸大義卽號召必且不靈未審尙有竇周公在否弟才非鎖鑰勢單援絕孤危特甚儻老祖臺肯執耳齊盟則元老臨戎軍聲克振况并州士女誰不感切棠陰若糾一旅溯流而北百里之內牛酒日至天下事尙可爲也幸商同志勿使先著祖鞭

答曹雲林書

徐兄來接有手教想徐兄掛帆時敝差官尙未到臺城故社翁不

審北方消息耳然做差官去後測事又一變及徐兄至弟已移師寄寓沙關矣種種口情已具在前日報文內不必更贅獨是僞令遷徙沿海居民百萬生靈盡入湯火中洵洵欲動惜無一勁旅爲之號召以致顛連莫告我輩坐視其荼毒而不能救真愧殺也弟栖遲沙關幾三月矣金盡粟空誰能爲景升仲謀者只得仍圖北返兩番鼓棹又以石尤畱滯今春風至矣决計回測亦且晚間事弟非不知兵力單極况二阮一陳俱徘徊閩境則弟聲援更微然弟之區區以爲寧進寸毋退尺寧玉碎毋瓦全其素志然也但不知果能自存否近有小詠云虬髯定擬浮家去雁足虛傳屬國還又云平原一旅真孤掌可有天戈靈武間感慨係之矣弟中夜自念一片孤忠或是天地間一男子而時勢交迫終不克昂首伸眉夫亦命也已竊意延平藩爲千古第一流人欲爲千古第一等事

乾坤正氣集

卷五十六

八

又何忍使同仇阡陌而不策應到閩海遷徙十已八九將來南北魚雁必愈濶踈握手之期杳未可料幸社翁努力努力倘張生竟以鬪死或飢餒而死社翁能不一爲表揚否耶徐兄適會弟于阮途勿克稍爲分潤何梁伯鸞偏遇范菜蕪乎一笑

與張承恩書

竊慕英名久矣南北相隔未遑識荆使人夙夜依依昔年使者至舟山備道足下高誼卽欲奉迎復以喬遷致失良會至今悵快不佞聞之智者識興亡於未形仁者懷君親於既往勇者决去就於先機若世俗之常見以口今有全盛之形必能圖磐石於永久然不知內實虛弱發號施令全無開國規模貴滿賤漢吏雜官貪兵疲糧乏民困財盡人心莫不思亂豈久安長治之徵哉英雄之事明華口之辨莫不以被髮爲辱雪恥爲懷所恨力不從心是以待

時而動唯海上羣雄聲大義于天下十有七載矣去歲長江之役  
幾得復失皆因人事不齊豈曰天意有待如今者明阿達里從浙  
而出不知費幾許民膏傷幾許民命兵未一舉而名口番部病沒  
過半遂不及接戰而遁此足見天意之口口矣達素自閩而出亦  
不知費幾許民膏傷幾許民命矢纔發而水陸三路同時覆沒明  
甲滿口口所恃爲衝鋒陷陣者爲我殲滅殆盡此又足見人事之  
口口矣况口欲舍鞍馬而仗舟楫與我爭勝波濤間何不量之甚  
也知足下忠謀義槩識時俊傑不於此時改圖更何所待乎且  
口貪暴無常有賄者超遷有功者罷黜近復重文輕武掣肘倍常  
足下當世賢豪豈能俛首聽命受文墨吏之侮弄哉若馬李高三  
公舍逆取順聲名赫赫膾炙人口但高李二公直至兵臨城下然  
後來歸方之馬公以無事之秋奮然反正不無軒輊故物望因之

乾坤正氣集

卷五十五

九

亦有重輕若足下原國朝之宿將更當先著祖鞭且明春大軍必  
至鐵騎金戈如雲而下黃龍青雀蓋地而來以此攻摧何所不克  
正可共建奇勳首膺茅土此足下之素志亦不佞所企望也古人  
有言當斷不斷反受其亂今足下反正之形未著謠傳已喧於遠  
近而嵩門失事鎮防卒能免咎第恐口中疑忌橫生典守見責寸  
符片檄便足以解兵柄而從吏議雖欲飛騰不可復得矣如吳高  
馬惟善前鑒不遠不佞竊爲足下惜之亦爲足下危之大丈夫見  
機貴於明決既有良謀義無反顧倘不以鄙言爲棄幸密遣信使  
確定師期如欲據台以取寧則不佞當統水師入定關相應如欲  
據台以取溫則不佞當檄陳阮二鎮進黃華相應倘以浙東四戰  
之地易取而難守不若會師灤道共圖金陵亦祈明示或從陸地  
而發則供迎于桃渚或從水道而行卽抵澣門以候敬布腹心惟

祈台昭不宣

冰槎集引

嗚呼此余槎上作也昔之乘槎者或爲客星而犯斗牛或入女宿而得支機故至今美爲勝事余獨不然浮踪浪跡當淒霰嚴霜不得已而棲托靈槎筆墨所及率成冰聲則是槎非貫月亦非挂星也而茲集所存又皆余晚節所作于是以冰槎名嗟乎水澤腹堅天根盡見矣乃從凌陰千尺間而欲論列古今辨正華夏不失君臣父子朋友之義不其難矣哉異日者東風解凍尙有想見枯槎中人而興嗟者否歲在壬寅菊月朔日記

子房報韓論

自古稱張良始終爲韓先儒論之詳矣今世事僞庭者多借此爲口實以口口固嘗驅賊遂以沛公亡秦子房事漢爲擬噫何其不

乾坤正氣集

卷五十五

十

偷之甚也夫子房在韓未嘗通籍而仕也特以五世相韓散金結客於時六國已無餘燼矣博浪一椎不過舒其憤鬱無聊之氣豈謂其必能碎祖龍之車藉令偶中而扶蘇尙在蒙恬輩皆宿將咸陽之火固未可覬覦也迨副車誤擊下邳潛遊子房智勇亦幾交困然而瀉池璧返羣雄並起而亡秦子房更出而將兵掠地與沛公遇于畱以兵屬焉韓尙未有王也迨沛公至薛與項梁共立楚懷王子房求得韓諸公子而曰橫陽君成賢說梁立之子房遂以韓司徒狗韓地其從漢入關懷王命也夫亡韓者秦也亡秦者楚與漢也子房仇秦則欲亡秦欲亡秦則必德亡秦者若是乎子房德楚則宜事楚德漢則宜事漢何必韓公子又何必韓司徒乎且韓王成不過諸公子非眞當立者而子房宰相之欲偕之國嗟乎斯其所以爲報韓也及羽畱韓王彭城弗遣而韓司徒不得不非

徇以觀其變觀史載漢王歸國子房送之南鄭辭歸勸以燒絕棧道此時雖爲畫策尙未委質也未幾楚竟廢殺韓王子房間行歸漢于是不得不以仇秦者仇楚既仇楚不得不借漢以疾楚然子房終不欲用於漢乃擇畱以自謝辟穀以自詭焉然則楚不殺韓王子房固不爲楚用楚不殺韓王子房亦安肯爲漢用耶或者曰子房嘗阻漢立六國後矣爲韓者固如是耶抑知漢王還定三秦已無公子成矣襄王孫信又齷齪不足輔使酈生計行而漢益弱漢弱而楚終不得滅楚不得滅而韓仇終不可報子房之爲漢蓋有大不得已于其間者焉至于我明則大異于是當闖賊之犯關也烈皇帝身狗社稷所陷沒者不過秦晉燕薊耳非若三韓之盡折入于秦也有子房者在必倡大義于天下較沙中狙擊之功相萬也況天潢之在東南者何止一公子成金陵擁立以至閩越推乾坤正氣集

卷五百五十六

七

戴中原正統方與日月爲昭彼中原士大夫者卽不爲太真歸闕而四皓可拔卽不爲仲連蹈澗而兩生可跣獨奈何以衣冠之旅爲□□驅策哉夫□□固我屬□也一舉而踞北都再舉而竊南紀共主蒙塵宗藩化碧而亂臣賊子顧曰彼沛公也亡秦者也我子房也報韓者也則是闖賊得比秦始皇而沛公實殺韓公子也則是子房當事楚霸王而□□可稱漢帝也嗚呼誣子房矣

李陵論

世以李陵報蘇子卿書出自史遷之筆蓋遷欲掩其保舉之失而所云欲得一當以報漢者陵則無有也余謂不然今觀其河梁諸什未始不歎風波之失所而瀏漓感慨無一慙漢之詞是亦豈遷所僞製耶卽就陵當日之事而論之方陵之出塞也初非疆場不靜而亭障失守也武帝特欲示威于四夷故窮贖其兵千里而趨

利陵不過一偏裨提不滿五千步卒深入荒漠殺傷相當而又鮮  
依飛貳師爲之後勁其勢固已危矣迨矢盡力持而後降志亦可  
哀矣夫陵之罪在不能死耳與棄師辱國者稍有間與事仇噬主  
者更有間矣而漢連坐之不少貸則安望陵之能爲朱序哉設令  
漢武聞陵之敗臨軒而歎側席而思爲之恤其毋撫其孥或誤傳  
陵已死事更爲招魂以祭卹典以贈之陵雖犬豕當必悔恨自裁  
矣敢忘漢恩德哉夫何功罪不明陵卒以族母怪乎論者謂漢少  
恩也倘陵而心懷逆節氣結重誅或教匈奴以盜邊或引華人以  
助虐不特子卿故節難留雪窖而匈奴十萬控弦直可長驅中土  
豈僅僅烽達甘泉而已哉然陵于子卿之歸國纏綿反覆贈之以  
詩而曰陵之罪上通于天其亦可哀也已夫陵當漢盛時起偏裨  
提孤軍出遠塞戰敗而降其族屬輒蒙顯戮當日士大夫無一言  
乾坤正氣集

卷五十五

十一

爲之辨解惟司馬遷稍稍言之而亦下蠶室此足見國憲之有常  
而軍律之不可追也假使陵荷節鉞之重會匈奴鳴張玉關淪陷  
漢家埽境內甲兵以托陵不幸而被圍遂倒戈解甲屈膝僞庭則  
其罪居何等也又使陵受賂卹之殊恩冒祭饗之異數而乘潢池  
弄兵反戈相向覆漢之宗社毀漢之衣冠甚至牽犬羊以芟薶漢  
之子孫黎民則其罪更居何等也由是觀之陵之罪不當未減而  
平反之也哉雖然刑者劍也一成而不變故君子盡心焉春秋之  
義美召陵城濮者深內夏外夷之防也怒仲臯季友者甚亂臣賊  
子之辜也則知我之所以論李陵矣

祭建國公鄭羽長文

嗚呼我兄飛熊上將汗馬元功樓船解外鉦鼓江中屏藩帝室帶  
彌侯封會逢喪亂益懋勳庸謀雲猛雨擊水搏風西江射虎南服

從龍登壇受鉞錫鬯銘鐘豈緊心膂允矣股肱制事旣褒閩疆旋  
覆再展霓旌重扶日轂不惜破家以襄監國九伯咸征六師皆督  
功在衣冠威行牙纛僞吏角崩名口面縛底績扶桑揚聲貴竹爰  
拜泥金遂膺璜玉憶昔在滫同盟連翩珠弁玉敦實惟九賢定西  
昆季肅虜姻媿安福差長相國比肩中丞司禮雁行周旋媿余下  
乘亦競先鞭或沒王事或終天年惟我與兄靈光巋然兄旣解兵  
余尙誓旅渺渺參辰盈盈帶水千里片紅經年尺鯁北顧旌旗南  
詢杖履奏凱相期加餐足喜懸擬壯猷東山復起夫何訃聞遽騎  
箕尾感切同仇痛深後死嗚呼哀哉山陽哀逝士衡辨亡交此百  
憂云胡弗傷兄所未暝野馬黃羊余所爲慟封豕大狼庶憑威爽  
默贊一匡些詞不文聊以薦觴鷺江滾滾鷺島蒼蒼忠精義烈山  
高水長

乾坤正氣集

卷五百三十六

三

祭叔父文

嗚呼叔父其死獄中矣其得疾而殞耶抑感憤引決耶姪自丁國  
難倡義辭家迄今十有七載吾父見背路隔華夷奔喪無所至今  
抱恨終天嗣是門衰祚薄猶幸叔父支持歲時伏臘祖宗血食不  
絕如綫今則已矣春仲姪提師北還始知叔父于正月下浣被口  
拘繫業赴省獄矣侄聞之痛心疾首計叔父衰老南冠泥首形影  
龍鍾其能久乎未幾而訃音果聞矣吾弟昌言以口網四張幸而  
得脫潛鱗戢羽將毋蘆中旣不能橐餗相救亦不能含歛躬親故  
叔父易簣之期竟不可聞而訃音亦得之友朋之書及六月三日  
弟來知叔父以四月十三日捐館始敢爲位而哭叔父年已逾耄  
因姪抗節遂以瘞死是叔父因侄而亡侄寧不痛心乎古來教子  
弟者動以忠義爲訓豈意忠義可爲而不可爲耶自古何代無廢

與其間必有忠臣義士仗節抗旌思扶王室因以傾家者往往有之若尊行受禍亦不少概見今口口棄天經毀人彜株連波累致叔父畢命圖扉姪獨何人能不肝腸寸裂耶姪自倡義以來屢奮屢蹶幾于嚙雪吞氈卧薪嘗膽招之不應購之不克始逮及妻孥故新婦與祺兒錮獄已經十載姪義不返顧自分爲劉琨爲卞壺矣何期復貽禍叔父耶前此叔父之得免者口視姪無分重輕也及己亥姪入長江連下名城數十口遂恨姪畏姪且忌姪而誅求不遺餘力卽我姊丈亦在不免而况叔父乎嗚呼痛哉叔父雁行有四人吾父居長止生姪一人二叔早亡無嗣三叔以壽終生從兄弟三人長嘉言次昌言又次德言叔父無所出昌言遂爲承祧然初無家人產今叔父既逝姪與嘉言皆在軍次歸里無期德言尙權弱恐不任箕裘則高曾之不祀忽諸是姪未能報國先已亡乾坤正氣集

卷五十六

齒

家矣嗚呼痛哉近聞共主蒙塵姪且重邁家難天道其果有知耶其果無知耶豈春秋大義徒虛語耶姪不能爲復楚申胥必須爲奔帛臣靡矣但旣無秦庭可哭又鮮有帛可奔終當爲伏柱豫讓耳嗚呼歸櫬何時拊棺莫望徒有泣血而已嗚呼痛哉

曹雲霖詩集序

甚矣哉懽愉之詞難工而愁苦之音易好也蓋詩言志懽愉則其情散越散則思致不能深入愁苦則其情沈著沈則舒贖發聲動與天會故曰詩以窮而益工夫亦其境遇然也余自丙戌夏浮海抵昌國未幾曹子雲霖從雲間來葛衣世屨不問而知其爲晉處士宋逋臣矣蓋雲霖先從大徹荆先生倡義來澗上荆先生死于兵雲霖遂還吳及由吳復入越黃虎癡

名斌卿  
蕭口伯

以國士遇之遂盡

護諸軍爾時張侯侯服

名名振  
定西伯

與黃侯同據守昌國

卽舟  
山 余亦奉

命持節護張侯軍時與雲霖旌麾相項背然未深知雲霖也余性喜醇子軍中一切不問而雲霖籌兵策餉無寧晷間嘗進三泖號召事蹶始還坐是竟未暇索雲霖所爲詩歌而讀之計雲霖軍書旁午當未暇製作即有所作不過如建安從軍諸什辭雖歡愉未必工也戊子之秋余入山蹇蹤跡亦與雲霖稍踈踰年黃侯以部曲生亂賞志僵死余在山中聞之驚惋累月雲霖此時將爲臧洪乎抑爲豫讓乎潛鱗戢羽幸舟逢鄂君而實車同廣柳遵海而南偶陷口穴至幽囚憂思萬死而得一生其愁苦可知矣歲在壬辰余避地鷺左雲霖儼然在焉歡然道故余時樂樂棘人且不敢輕有贈答而雲霖囊中草多感時悲逝亦不肯輕以示人工不工余何由知之迄癸巳春余附樓船北歸雲霖畱閩踪跡又稍遠既又聞其自閩次楚圖入覲行在道梗不得前復自閩至吳風塵蕭瑟乾坤正氣集

卷五百五十六

五

孤臣愁苦雲霖固備嘗之矣適昌國再陷余舟過三山復與雲霖相勞苦而張侯墓草已宿矣雲霖與余論國事之廢興悲滄桑之變易感入心脾稍稍出舊什新篇相示余旣歎其工未始不哀其節苦而神悲也年來雲霖膺帝眷秩中丞或佐雄師入江或從名藩泛海山河之感切中湖海之勝娛外累牘連篇無非騷雅余方聚族北道與雲霖踪跡離合恒相半雲霖每以新製見寄輒作十日喜復作十日愁是何其思深入其情沈著也工固至此哉然後知愁苦之音果勝于歡愉之詞也茲雲霖將削稿以付剞劂氏貽書問序于余余謂余非知詩者卽雲霖亦寧待以詩傳惟是雲霖之境遇子與雲霖之交遊不可不借詩以敘次其大概耳若太白之詩而仙少陵之詩而聖以及沈宋沈鬱王孟悲涼儼之雲霖或同或異則余同年徐闇公必有定論矣

張閣學文集卷二

乾坤正氣集

卷五頁五十六

涇縣潘錫恩校

去

任人宜責實效疏

題爲圖治莫先用人任人宜責實效敬陳末議以救時艱以維泰運事臣三世累受國恩六載叨居民牧當逆燄薰灼之日正跽伏草土之年請劒有心傾葵無路茲者幸逢堯舜首出日月重明遠追懸鐸之風大暢闢門之典雖樸櫟如臣者亦得濫廁掖垣臣卽捐糜頂踵何以報答高厚竊見年來紀綱淪數廉恥銷糜國是乖張邊功虛冒總繇爲大臣者顧身家之念重急君父之心輕澳泓依阿相習成風祇以全副精神爲邀榮免禍之術而內而百司庶僚外而藩鎮節鉞靡然從之莫知底止今我皇上誅凶翦逆黜佞褒忠曾不半載而海內人心士氣俱奮然有頑廉懦立光景古云乾坤正氣集

卷五百五十七

一

一人元良萬邦以貞非皇上文武聖神烏覩此哉然皇上勵精圖治朝夕不遑而臣下反多頽靡玩愒何也則政本之地委宜得人也當神廟初年江陵柄政凡民生國計吏治邊防事事綜核件件精明自大臣以至小臣自內臣以至外臣凜凜救過不遑隕職是懼雖事嫌刻覈元氣微傷而廊廟邊疆皆有精明彊固之象則以江陵不徇情面惟責成功故至今譚相才者猶不能不追思之也邇來相業其不肖者固無足論卽所稱賢者大都主調停之說模稜兩可絕無主張甚且望意指於把持朝局之人凡所票擬甲乙交是涇渭不分間有異同又屬偏見揆地如此諸司何以奉行綱目何繇張舉臣愚謂處今日論相者當先論相骨論相才而後論相度閣臣李國樞雖登庸於逆璫用事之日亦其遭時不幸然近居政府見其主持調燮儘有可觀且練達老成事機到手了了

能辦此斷宜留之以待舊輔之來且以聯新輔之脈者至於已挂  
彈文而中懷猶豫當茲聖明在上日月照臨瀚滌肺腸以圖報塞  
愛惜名節而思見幾此其時矣輔臣而外首急銓臣銓臣爲用人  
總途秉心固貴公虛而尤須有定識有定力廣聰明於四達而又  
未嘗寄耳目於私人破畛域於周行而又未嘗引姦回於捷徑中  
外屈指如王永光中立不偏允稱其任衆議久已僉同矣似宜卽  
推銓席以竟其用而司農之任如鄭三俊李長庚畢懋良皆其選  
也當此民生告匱邊餉告急之時又可不速補一員以濟燃眉乎  
其次又莫急憲臣先朝顧佐爲御史大夫鐵面霜稜臺綱凜凜至  
今言之令人起敬起畏蓋御史大夫總持法紀激濁揚清非勁骨  
清操夙著朝端者不能勝彈壓之任也以臣所聞如原任南總憲  
曹于汴挺特立獨行之節有不爭不黨之風以肅百僚其庶幾乎

乾坤正氣集

卷五百五十七

二

至於巖關要地非得真正邊材兼肯實心幹事之人鮮克有濟如  
原任兵部侍郎李邦華八面雄才按浙撫津實饒經濟舉朝無不  
知之者近者諸臣虛公推轂業蒙賜環但以河道處之雖非用違  
其才尙覺才優於用似宜亟改補戎政之缺與樞臣王在晉共協  
中樞以備關門督師之選而呂純如祁伯裕武之望諳練邊事猷  
略過人皆可當中樞戎政之任者邊才不妨預儲樞席繇來添設  
是在當事者加之意耳臣初入班行非敢博薦賢之名也念欲挽  
玩愒頹靡之世須先用精強卓特之臣且銓憲二臣尤與政府相  
爲表裏兵農重任更須宏才共効助勦圖治急著實無踰此伏乞  
我皇上申飭新舊輔臣共矢精誠力肩重任稟擬勿徒循酌覆二  
字敕幾務期臻實效一途更嚴敕會推諸臣大破方隅廣羅者碩  
俾邁軸名賢蚤登一日則朝廷蚤收一日之用其有裨聖治非鈔

小矣臣無任激切悚仄待命之至

順情平法疏

題爲王道有必順之人情聖朝無不平之法紀謹摠芹曝之忱仰  
佐蕩平之治事臣惟大學論平天下而歸其道於絜矩矩者何即  
上下前後左右人情所必至之處也賞罰彰瘡微有偏枯好惡是  
非遂生麗雜固未有建極之聖主而不求合于直道之斯民者年  
來逆璫煽禍衣冠巨寇從而翼之賢奸倒置忠佞紛淆長安不見  
日久矣天開聖主離照當空彰瘡風聲炳燦千古海內人心真有  
危而復安晦而復明景象然以臣愚見尙有一二不能快乎輿情  
者則以在廷諸臣各執我見不肯去仄以歸平也臣請得而詳言  
之如張差之案主風癩者雖爲仰成慈孝之深衷然主挺擊者亦  
未始非保護東宮之至意千金之子突有無知執械闖入內室爲

乾坤正氣集

卷五百五十七

三

紀綱者尙當執而問之禁中何地任妄男子作此舉動而一味以  
風癩二字抹之乃慈寧召見劉光復以半吞半吐之詞迹涉唐突  
以致觸怒幽囚今旣追錄其忠贈卹祭葬頻頻有加矣而赤心保  
謹東宮之王之案無望贈卹殊恩并復官而斬之至今藁葬城外  
遺骨不能還鄉恐先帝有靈當自憐之千秋有史當自白之臣之  
所謂不平者一也紅丸一案主弑逆之說者固屬偏見然先帝聖  
躬委頓至此豈臣子嘗試邀功之日彼崔文昇李可灼不加顯戮  
則亦倖矣乃優旨批答放歸原籍揚揚晝錦卽今聖明在御褒忠  
殛佞千古一時彼嫉惡防奸之孫慎行尙推敲啟事不遺餘力而  
么麼可灼先登訪冊儼然與廢棄諸賢並列何以服天下之人心  
乎臣之所謂不平者二也移宮一事在楊漣左光斗等一時激烈  
微過或不能解于居功逼上之疑然一腔擁護先帝爲心亦未始

非杜漸防微深意賈繼春之持論自是移宮後一截處分所以補  
漣說之未盡非相反也今必欲以移宮一議爲漣罪案何居乎漣  
幸而有擊璫二十四罪之疏不能沒其除奸大功贈卹不得不從  
優耳使果如諸臣一偏之見不將與王之案孫慎行同其沈抑乎  
臣之所謂不平者三也封疆爲重彼失事者罪總無逃矣乃罷廷  
弼梟斬西市且傳首九邊而三路喪師之楊鎬與擅離汛地之王  
化貞竟逍遙福堂甚且有以化貞登薦牘者又何以服廷弼之心  
并何以服天下人之心乎人皆知廷弼以門戶殺非以封疆殺而  
究竟無人敢訟言之者使服辜者服辜而漏網者漏網將來何以  
嚴邊臣失事之禁乎臣之所謂不平者四也楊左與王安聲息相  
通誠不知其有無然其主意無非羽翼先帝於神祖升遐之日使  
倥偬之中大權不至旁竊宗社安於泰山初非與安有交結之情

乾坤正氣集

卷五十五七

四

如崔呈秀黨附魏忠賢爲不軌之謀也今乃動輒以楊王崔魏爲  
對案無論楊不可與崔對卽王亦豈可與魏對又以楊左交結王  
安與崔呈秀交結魏忠賢同類並稱凡有心知孰不痛之今卽贈  
廕卹錄恩典無所不至然以一片血忠被此惡名保無飲恨于九  
泉乎臣之所謂不平者五也大臣者小臣之綱也而宰相尤爲諸  
大臣之綱向者阿璫取容藉璫作勢已多次第伏法然大者卿貳  
小者臺郎彼見巍巍政府甘作乾兒誰不惴惴身家自捐名節今  
五虎輩雖罪未盡法賊未籍沒人心猶有餘憾然亦旣顯暴其罪  
狀于天下矣彼造意主謀無毒不具之魏廣微固寵逐擅無醜不  
備之顧秉謙與夫媚璫而反取厭之馮銓璫敗而猶彌縫之黃立  
極顧乃死不戮屍生不褫奪竊恩綸而誇奕世擁富貴以樂餘年  
其何以爲大臣黨閹之戒乎臣之所謂不平者六也至于同爲首

擗慘殺之忠臣也乃楊漣左光斗魏大中先後業邀卹典而六臣何以偏遺其半將需論定於何年同爲建祠奪情之逆黨也乃李養德潘汝禎等削奪業有明章而延撫何以獨寬于法夫豈線索之潛布以至被彈破甑不難躡居清署而逆璫時橫遭削抑之盧化鼇李若愚貢修齡等反尙聽其浮沈廢籍名賢方悲目斷華津而神祖朝顯被察處之湯賓尹反謀爲之推轂諸如此類均屬未平方今公道昭明羣情踴躍已無復閉鬱偏枯之病而或巨奸偶藏鋒于脫網或幽貞猶抱泣于向隅或薰蕕蒼素一時尙多存譏亂之言或黜陟袞鉞四海未盡愜澄清之望有一于此俱非蕩平臣是以不避思讎不顧鼎鑊爲我皇上直陳其原委伏乞我皇上詳加鑒察將臣所奏付質公評更敕在廷諸臣共捐偏倚之心仰佐平明之治要使是非迴別人情無不協于中舉措咸宜法紀無不歸于極堯舜基隆之盛治再見于今矣臣無任激切悚仄待命之至

直糾貪昧閣臣疏

題爲直糾貪昧閣臣以肅朝廷以伸士氣事臣聞禮義廉恥是謂四維維者維國也況宰相尤秉國之均而四方是維者乎自天啟四年以後大臣背禮滅義捐廉棄恥良心夜氣漸滅無餘如臣前疏所指魏廣微顧秉謙諸人行徑不同好貪一轍眞舉朝之所羞聞而士林之所不齒者也近者施鳳來張瑞圖以人言去雖各有本末原不相掩然碑文四六業經道破豈容視顏蒙面復玷朝班皇上允其告歸眞所以全大臣之體亦所以重朝廷之體乃不謂尙有瘡痍滿身依棲丹闕汚政府而辱綸扉如大學士來宗道楊景辰其人者宗道居宗伯時爲罪樞崔呈秀父母疏請越格祭葬

奏內在天之靈久已喧傳海內然屢經論列甘作耐彈綿花彼其意不過謂此事業已卸責承行吏書止自居失于簡黜便可了此公案夫大臣有一奏疏不能簡點而反能平章軍國者乎臣又讀邸報見河南按臣鮑奇謨辨建祠一疏忽邀守正不阿之旨殊駭聽聞及經台臣甯光先參駁皇上查票擬何人宗道乃自認票出其手而止以誠見不明衡量不確自掩其非閣臣身掌絲綸惟辟威福所從出也而乃至票擬失倫使煌煌天語不見信于天下萬世罪將焉諉而尙可使之一日居揆席乎至於景辰在翰林在禮部時三疏媚璫鑿鑿有據皇上業簡媚璫諸疏陳於御前彼其媵阿醜態業已無逃秦鏡中矣爲景辰者自揣清明之世公論難容急應引退林泉猶不失爲自全晚蓋之策乃乘李國楫謝病之日居然首輔自居揚揚入閣辦事一似全無瑕點容人指摘者獨不

乾坤正氣集

卷五百五十七

六

思國楫從無媚璫實蹟止以人言一至大臣義不可辱遂爾浩然長往今景辰自勵果能與國楫相低昂乎否乎臣又從邸報見景辰直陳要典一疏夫要典之副總裁景辰與焉方自幸得廁名不朽之書及崔魏旣敗是非大明乃蒙面轉身又欲自附于議燬之公舌以爲藏身著腳之地小人屢易其頭面君子直見其肺肝矣亦可使之一日居揆席乎臣非不知兩臣皆出自枚卜豈容漫爲指斥第念當日會推閣臣之人未必皆赤心自意之臣也懼公論之不容推轂因多賢者牽情面之難割吹竽豈乏私人兩輔臣之協夢卜于金甌未必非天心之試鑑衡于皇上今皇上畱兩輔臣國體之所全者小皇上去兩輔臣國體之所全者更大兩輔臣皇求去而皇上畱之國體之所傷者少兩輔臣戀戀求容而皇上畱之國體之所傷者實多昔嚴挺之寧不作相不見李林甫崔隱

甫寧不作相不見牛仙客當此瀾倒波靡之後正宜擇清貞勁挺之士居揆地而作楷模于以惕方醒之人心作久頽之士氣乃平章何地任此輩久據長饗使天下賢士大夫謂如此聖朝而患失鄙夫猶赫赫居具瞻之位恐非所以煥重光之日月而扶再造之乾坤也伏乞皇上卽將來宗道楊景辰速賜罷斥以爲大臣貪昧無恥者之戒但使朝廷得肅士氣得伸卽禠臣職以謝兩臣臣固甘之矣臣無任激切悚仄待命之至

嚴誅附黨臺臣疏

題爲公論漸明邪氛復熾謹據實糾參懇乞聖明嚴誅附黨臺臣以快人心以清仕路事臣惟魏崔之世舉朝混濁不清附隳逐臭之夫保富貴全性命爲急其蒙面喪心有繇然也今者聖明在上日月雷霆罔不照臨罔不震疊誰敢復有懷私植黨鼓煽邪說淆

乾坤正氣集

卷五十五十七

七

亂是非以自干聖朝之三尺者乎乃不圖竟有江西道御史袁宏勳其人者宏勳于辛酉分校北關賄賣關節噴有煩言近者鑽謀考選以同鄉周昌晉之力得濫廁臺班長安無不薄之乃乘權藉勢穢狀彰聞有謂其爲劉志選之甥日求當事寬處又爲兒女親懷挾舉人邵喻義營求辯復者有謂其受五彪內許顯純之賄致書刑部問官求寬擬罪因公論不容乃求寬刑又爲顯純之弟顯道求寬刑輕擬者事涉風聞始不具論止就其章奏內顯而可據者如薦閩鳴泰行邊而力參督師王之臣彼豈眞爲封疆慮哉嗚泰自知清議不容欲借行邊以掩其媚璫建祠之罪特授意親知以五千金囑宏勳參之臣而薦已而宏勳不得不從之也而一疏列薦武弁數人此豈皆赴赴干城之任而絕無根柢之容者乎金珠萬金之說未必無據矣又如孫慎行訪冊遺名以公論不容勦

強增入此亦舉朝大不平也宏勳乃特疏參之且比之構釁官闈之梁夢環劉志選而慘死詔獄之左光斗周朝瑞等復遭罵辱已被聖恩之惠世揚毛士龍等復嚴禁錮一手握住居然與通國爲讎而不顧天下萬世之公議此尙有人心者乎至於舉朝之推薦舊輔韓爌也固屬輿情亦出聖眷宏勳或迫衆論之公或切師生之誼薦之可矣乃始而薦之旣而譏之且一疏中旣佇望其蚤來復懸料其不出語語譏刺言言阻撓又惟恐爌之果出卽出者此眞逆見爌之必不效乎抑有礙于嫉爌者而不得不出此疏以達其喜乎朝廷特起召一大臣乃以供宏勳口舌之播弄乎尤可異者邇來政府專事調停漫無張主自閣臣劉鴻訓與同官李標入直辦事掃卻情面一力擔當旬日間遂覺有一番振作精明之象乃宏勳自以去其所瞻漫肆詆排不曰兇鋒殺氣揚揚眉宇則曰

乾坤正氣集

卷五百五十七

八

獨腕把持公行報復使如宏勳之意必模稜兩可凡有論劾牢守不必深求不必追究二語而後爲培養元氣乎必曲庇論劾之人而重加言官之罰輕則罰俸重則降調以謝被言者而後爲主持國是乎且被言者生平各有本末舉朝自有公論不得概舉也卽就中處分一時或微有分別未清之處要如明旨所云功過各不相掩亦不得藉口伏讎案之端也今乃曰爲崔魏報讎不知宏勳此疏又將爲何人報讎乎尤可異者賄中逆子喪心無賴之孫之獬主張要典極力殺人之徐紹吉舉朝方以處不盡法爲憾而宏勳則爲致惜致痛而孫慎行之登薦此出輿情毛士龍之投到原奉明旨與閣臣何與而亦牽扯入內豈宏勳所謂大開羅織之門彌張打盡之網者其自道乎至誣閣臣以滿載參貂潛通賄賂上有莫欺之天日下有直道之斯民又無容與之分辨矣總之宏勳

腳跟本邪行事本穢自知無逃清議乃故爲撒潑無賴以爲自救之急著而又有主謀徐大化等爲之引其線索佐其兇鋒宏勳特受發縱指示于人而已全無張主者也堂堂鷹繡不思爲朝廷驅奸指佞而乃爲私人修怨復仇且今所值之時爲何等時今所事之主爲何如主而魑魅魍魎公行白晝共驪苗繇煽燄虞廷豈不亦咄咄大怪事哉伏乞皇上毅然雷斷卽將敗羣之宏勳嚴行究訊主使何人撓亂何意立加顯戮以爲邪說亂政者之戒仍申諭閣臣力矢擔當勿懷猶豫堅持初意仰答聖恩與同官李標等協恭和衷商確機宜一切稟擬不激不隨歸之至當將見煩言永息而至治彌臻爭黨盡消而蕩平立奏矣職無任激切待命之至

黔事速賜處分疏

題爲黔事萬不堪再誤黔督萬不可再誤懇乞聖明速賜處分以

乾坤正氣集

卷五百五十七

九

毋自誤封疆事竊惟今天下大事莫過于遼與黔之用兵而近又與閩寇顧閩伺黔釁而生者也黔又伺遼釁而生者也遼陽旣陷尙有廣寧一旦驚風鶴之逃爲拱手之棄人皆曰王化貞熊廷弼之罪而不知本兵張鶴鳴之罪殆爲過之夫鶴鳴胸填鱗甲吞逞包恹其踞中樞也無他伎倆惟有潛通線索于魏忠賢日佐王化貞以與熊廷弼構鬪于口舌間耳及河西洩潰廣寧七百里之地輕輕斷送而鶴鳴自知不能脫然無累乃輒起好細一獄以自爲功以爲卸罪地夫文致一二莫須有之好果可以贖失策喪地之罪乎殺人自掩卸罪冒功卽立伏斧鑕亦豈爲過乃猶揚揚視師垂涎故座藉非公論沸然省臺諸臣彈射卽求踉蹌一去亦不可得矣願畢竟以忠賢與援之力得追于三尺非倖之倖乎未幾徒黨崔呈秀來與李營生共謀更首推轂鶴鳴起南工部尙書又未

幾改兵部尙書總督川湖等五省兼巡撫貴州也借言鶴鳴向撫貴州輕車熟路耳不知邦彥初本安酋餘孽小醜易制自鶴鳴噉其厚賄署攝巡捕假以兵權遂成尾大不掉之禍是誰階之鶴鳴不但誤遠且誤黔已明彰較著矣乃必欲噓灰再然者豈其爲封疆起見哉魏忠賢看工時大言欲用鶴鳴于黔李夔龍等頰首奉命誰不聞且見之蓋此時忠賢等逆謀已定多布腹心于天下要害之處西南半壁非鶴鳴不可恃故陽建置之陰倚託之而去督撫閔夢得以一事權于鶴鳴從中舉事無慮川湖等處矣初入黔時卽鶴鳴妄自擔當亦輒意邦彥夙與渠狎可受繚籠萬一撫成且先爲忠賢豎一片功德碑與摩崖銅柱均稱不朽豈非鶴鳴快心事乎乃天祚聖明長夜忽旦乾坤氛氣一朝頓掃鶴鳴冰山忽頹魂魄若失邦彥更輕其昏耄益肆悖慢木牌遺書數其爲撫時

乾坤正氣集

卷五百五十七

十

受過黃金珠玉以巨萬計乃始怒而議勦夫勦豈易事鶴鳴豈能用勦以收功者但聞其驕蹇如故凌轢有司鞭笞士卒一切文移並束高閣時有章奏俱左右代爲之市棍衙役皆以賄賂濫給參遊劄付冒餉無算試問鶴鳴入黔閱歲曾設一奇畫一策乎曾交一兵接一矢乎日曉曉索餉二百萬卽具二百萬餉果能無冒破而盡用以了黔事乎故臣謂其五官之不靈必不能使百萬之用命則宜去債轅于已事必不能使桑榆之晚收則宜去逆賊之心營必不能鼓師中之忠勇而成闔外之大功則又宜去不但去督撫併其向來宮銜世廕濫冒隆恩一概褫革臣猶見有逸罰也竊聞曩者播州之役初爲江東之譚希思等誤糜財喪師後用郭子章于貴州江鐸于偏沅支可大于湖廣而李化龍爲總督夫然後分兵八路奏功一時雖其衆力齊奮實由提掇有方也爲今之計

無如仍設黔撫而擇堪總督如楊鶴傅宗龍朱爨元閔夢得者駐于蜀之重慶遵義間楚蜀滇粵同心共濟如臂使指輸餉不費多方設處務爲蕩平休息計庶有救乎如滇撫謝存仁盡撤防需益兵示不復爲犄角意且去歲欲輕身入水西受降非黔中院道力阻不幾爲王三善之續乎所當擇人而用以望助黔一臂者也臣方草疏更聞鶴鳴遣子張大同輦金來長安更多攜空頭劄付市鬻又當有神通以施矇瞽以保富貴臣不量輒爲直糾祇念封疆大事關係至重不敢避兇鋒以嚶嚶伏候皇上立賜乾斷施行幸甚臣無任戰慄待命之至

特表忠清疏

題爲特表忠中之忠清中之清慘中之慘仰祈聖明特賜殊旌以風頹運并乞優恤寃獄幽魂以回天和事蓋聞褒忠獎直帝王勵

乾坤正氣集

卷五百五十七

七

世磨鈍之大權拔異旌尤聖人微顯闡幽之妙用自闡賊魏忠賢與奸相魏廣徵表裏爲奸羅織忠臣誅鋤義士一時慘死諸臣詎可置短長于其間哉顧就其中屋漏盟心純乎君父家如懸馨節比秋霜詔獄之際開千古廷尉所未有之刑畢命之時受千古忠臣所未經之痛則于諸臣中職獨揭三人焉曰楊漣魏大中周順昌三臣以公正發憤而遇禍災天下亦了了見之矣然亦混跡于同死諸臣之中而未有能發其幽光者夫漣何如人也自爲諸生孝友端方慨然以澄清天下爲己任家徒壁立志氣軒如其筮仕臣鄉常熟也鐵面冰稜吏胥不敢仰視而愛民如子卽嬰兒婦媪咸得自盡其情蒞虞五年不名一錢百廢具舉錢糧之絕火耗上下百年僅見漣一人耳入計時止餘兩袖清風欲送其老母歸楚至不能治裝以去及居言路揚清激濁屏絕餽遺寒素之風依然

白屋但一言及國家之事未有不耳熱面發赤如念其祖宗父母迴腸刺心談及神祖光宗未有不涕泗交下故其臨死之日亦旁無一語但呼高皇帝陛下而已逮繫之日漣自湖廣達京師三千餘里隻身策蹇驢未嘗一日乘小肩輿未嘗一日騎馬背入都門小民有歎息揚都御史清官今日何至于此詰朝而歎息之人斃命于厥衛矣誰復敢私語稱其寃者漣死于溽暑踰四日方奏聞比領屍骸手指腫爛欲斷足之聯于脛絲毫耳迨下令湖廣追贓漣傾斜一屋所值幾何漣母棲城樓諸子乞食以養之縣官無可柰何爲設櫃于四門遠近士民爭來投櫃納至萬餘金夫應山非甚富饒也惟正之供猶自難完而爭爲漣納此豈能徵發期號哉夫人臣抗節直言慷慨殺身歷代史書常常有之如漣之貧不言清勞不言功從容就死無怨無尤方之宋岳飛明知十二金牌出

乾坤正氣集

卷五十五

十一

自秦檜之手而俯首就僂斯亦可謂人臣之極則矣若大中何如人也大中爲孝廉十餘年足跡不一至郡縣之門設館餬口欣然自足自成進士以至受職行人擢選諫職從未嘗受人一錢官至吏掌垣猶賃屋以居無一椽一瓦邑中豪強與縉紳家凜然畏如嚴師而獨與閭里小民如家人父子逮之日微臣與南京吏部主事魏浣初往送之見閩邑哭聲震天搥胸踊地黃童白叟無不皆然及覽追贓之疏不過里老代完銀若干士大夫代完銀若干大中書劍賣質銀若干而已當魏璫虐餓熏天耳目布滿之日使大中不眞賢豈能號召士民爲之還贓使大中不眞貧眞苦至于此極有司又敢如此上悶乎大中同官旂過常州知府曾櫻送之潸然淚下大中顏色不變慰之曰臣子死于王家男兒常事何必爾爾櫻括清俸百金託詞臣鄭鄭轉致大中堅持不受曰譬如媵婦

孀居數十年垂死中偶動一念便屬失節簪華而睨不敢以不易也嗚呼櫻固賢大中尤不易矣至其詣鎮撫也大中受殊刑未死猶鞫鞫如轉輪既死魏賊令獄卒投其屍以喂狗故夫大中之屍所存者狗之食餘耳大中之下獄也嚴戒其子學泚曰吾當死子不當死子死則寡母誰侍幼弟誰教故不令其子至獄門一步比學泚扶柩而歸猶未知大中之死狀至病中忽然聞知一號而絕嗟夫子孝臣忠萃于一門矣若順昌之死則又異焉順昌賦性清嚴嫉惡如讎卽親朋不少假借官福州司理墨吏望風咸解綬去值稅瑞高案肆毒順昌方署府篆挺身抗其兇鋒民賴以靖忤瑞之聲喧播朝野擢居吏部一洗陋習四方竿牘絕弗敢通請告歸籍止用肩輿一乘行李二臺而已里居時微臣時一過訪之見其

乾坤正氣集

卷五十五

七

田無數畝室無數楹蕭然如老衲寒僧意豁如也魏大中逮過閭門順昌以大中必死親詣其船纒纒問其家事遂以女許大中之孫緹騎以聞瑞銜之最毒遂假手李實一疏逮賢臣七人而順昌與焉順昌居鄉不畏高明不侮鰥寡等之大中以故俄頃之間哭閭數萬士民狂號亂哭衆憤所激擊死官旂幾成大變順昌跪而哀求謂爾殺官旂而又不散貽我不忠且滅我族小民無奈順昌之遠至也魏賊使人給左光斗曰爾輩第不辨一言當俾爾等生還于是光斗誠諸臣我輩畱此身異日尙可爲朝廷用今日徒死何益是以諸臣無一言然終以死順昌實憤之故至鎮撫司而唾罵者惟昌耳而昌因此被刑尤烈昌已死踰牆而擲其屍于夾道中獄中巡卒撫其屍以磁鋒割其股血潰而甦復械至錦衣堂上

昌爵石碎首血濺几案罵魏賊不絕復加重刑立時隕命使諸臣之死盡如昌魏賊或亦爲之寒心也此三臣者其清風高節無愧于高攀龍鄒元標而死事之奇慘過之死事之奇慘諸臣多有相同而清之至極忠之至純三臣似尤覺振衣千仞之上今楊漣旣已謫諡祭葬無弗兼舉天下感國家待大臣之禮不薄而大中與順昌僅蒙贈廕祭葬而未有諡祠職愚以爲聖王御寓必有一番越格超常之典以優忠節之士如漣如大中如順昌方之前代則楊震范滂之流卽求之本朝亦劉球海瑞之匹此卽得一人焉已足砥峙頽波乃三人旣並生于一時而三人被禍之慘亦並集于一時上下古今指不多屈似應將三臣特加旌表于贈官廕諡之外總敕賜一祠仍給扁額俾三臣生前爲第一清忠之品死後亦邀第一褒卹之恩且三臣臭味一同英靈不散其盡忠以報皇上

乾坤正氣集

卷五五十七

七

固不以存歿而殊而且使薄海內外知大聖人待純忠亮節如此其殊異優崇孰不剗腸瀝血以圖報稱其所爲鼓舞激勸之方尤迥出于尋常旌典萬萬也抑職于是而有感于天時之驕亢不雨也豈以皇上之精誠而不能格之冥漠昔有匹婦含冤而六月飛霜者今魏忠賢之冤獄豈止匹婦而已乎其已蒙皇上之恤錄者大抵皆官僚也而青衿之立斃窮民之橫死獨非天地生之君父育之者乎其斃於鎮撫司者或猶得而知之其無端而斃於東廠者不但人不知其事抑不知其姓名矣杳杳遊魂其肯瞑目乎職謂宜下令鎮撫司與東廠衙門凡魏忠賢六七年中所殺之人盡數查出或有其夫已死而其妻不能自存或其子已死而其父不能自活皆令所在有司略與優恤或竟有父子兄弟盡無所存而魂魄茫無所歸者則下禮部爲壇以招諭之昔伯有爲厲子產立

後而厲息況帝王之臨天下也明以治臣民而幽以治鬼神其道不能偏廢且昔日無辜之臣民橫受魏賊之慘死而今日無辜之百姓又以死者之怨氣受天災之旱疫是何魏賊之流毒無窮期也故弔死理冤又今日挽回天意之要義也伏乞我皇上允職所請卽敕該部速議具覆立見施行職無任激切惶悚待命之至

具此疏將上先致扎於長山劉青岳高邑李建霞兩相公今并原扎附錄

病中具一小疏欲爲詔獄中異等三人乞殊旌也字字可質鬼神須老相公主持批允不肖躬乃敢上茲先以藁呈覽此固匹夫匹婦之公心亦忠臣義士之榜樣也惟老相公圖之特此候示不一

端相本疏

乾坤正氣集

卷五百五十一

五

題爲公清館選之途以端相本事臣竊聞昔賢云天序日月星辰以自光聖人序爵祿以自明天子之置三公蓋法上天之三光也臣嘗稽古之三公論道而不與政漢之三公治事而不論道惟我朝之設閣臣旣論道而又與政入則論思啟沃關君德之污隆出則定事決疑首百官之善敗任莫重焉然臣見近日政府立身非禮公論共排譏刺滿身顏甲以出橫口潑詈等於市徒竊歎官至揆席豈復更有加之者縱不爲一身名節情獨不爲官常愛大體乎反復尋繹其故蓋繇發軔之途不清樹藝之種不慎也臣考國初宰相不專拔于翰林之一轍累朝相沿途徑猶寬至世廟以來則枚卜之舉大抵俱屬之翰林矣是庶常之官卽他日平章軍國之人今日卽慎選行修言道士猶恐他年晚節或未愜其初盟豈有始進之時先叢物議而異日立朝能爲國家樹光明俊偉之

業者乎臣初入班行卽聞長安自殿試以後其介然不苟之士誠不乏人而一種躁競之夫日夜講求謀所以必得館選之法鑽求百出敗簡難言或機關預設妄希張鷟之青錢或根底先容冀受和凝之衣鉢又或排人蓋已無風作波伏顯射于含沙利相持于鵝蚌甚有以心期共許之友祇以眉睫之得失顯作猜疑陰相傾軋世風如此良可感歎孔子曰尊賢則不惑敬大臣則不眩以翰林而漸臻講讀師傅不可謂不尊矣以翰林而馴至宰揆亮采不可謂不敬矣夫豈其已之惑未清而能清紫宸之惑已之眩已甚而能定國是之眩者乎以是人而當是非混淆之日必當佐非以亂是主持之擔誰肩以是人而當陰陽相戰之時必當扶陰而抑陽變理之能誰寄凡諧臣媚子之態翻出于禮宗而稱功誦德之詞遞見于元老皆此不明不白患得患失之人貽之也且今之時

乾坤正氣集

卷五十七

七

何時也聖人出世天地清寧值龍飛之首科尤萬方之瞻仰豈可不蕩一時之陋習端始進之臣心臣謂今年館選宜照殿試法皇上臨軒而試之令考試諸臣卽于御前定其去取正額之外多備副卷以聽聖裁其殼外諸卷亦當盡數亟呈間有遺珠不妨特拔凡若此者所以抑躁進之人知此番之試無晝然必得之法又所以來高潔之士使知聖天子雅意求材當振筆一吐胸中之奇不必拂衣遠引避館試如浼也其試士之題臣愚謂宜倣古制考以今日吏治民生經邦強國之策不必盡依舊例以風雲月露之詞費精神於無用也濟濟多士豈無有董仲舒賈誼之流以應皇上之眷求者乎臣考洪武癸丑命翰林張唯等入禁中文華堂肄業詔宋濂爲之師高皇帝聽政之暇輒取其文親評優劣可見選俊儲材簡自帝心聖祖已有行之者矣臣故不揣狂愚謬干天聽抑

臣又思古者左史記言右史記動凡以天子一時之言動卽萬仕之法程慮或湮遺故以史臣專其事凡天子召見羣臣商議時政則史臣必隨之今皇上再舉召對海宇欣瞻而臣等侍從之臣反有未能詳知當日光景者雖閣部大臣于陳謝疏中微有條敘亦似約略言之伏乞今後凡遇召對卽命史臣二人簪筆入侍記注詳核隨于次日具疏奏呈一面發鈔一面宣付史館庶四海快若親承而萬世垂爲永憲并望俞詔施行

陳時政急著疏

聖主圖治甚殷愚臣竭忠有素敬陳目前時政急著以佐平明之治事伏見我皇上皇皇求治面諭羣臣以修職業戒紛囂不啻三令五申詎有躬逢堯舜之主而不洗滌肝腎精白乃心仰答五位之憂勤下酬四海之責望者然或有徇法守之心或不勝其徇情

乾坤正氣集

卷五百五十七

七

而之心爭國體之心或不勝其爭虛氣之心則刑賞終不平是非終不定朝廷終不尊以語畫一之治猶未也臣請得畢其狂瞽列爲七條以備皇上之採擇焉一曰起廢之不可不核也今之言起廢者孰不藉口魏璫之摧折然必其真正清操絕俗勁骨違時前後始終毫無點染而被抑被錮獨久獨深者亟宜登之啟事發其幽光至於依草附木占風望氣或始媚而終攻或始攻而終媚或自以彌縫不到偶遭厭斥或曾經受其指使陷害忠良此等皆是無骨小人若止憑薦牘先起原官則薰蕕同器賢否混淆而眞君子終無吐氣之日矣臣愚以爲自今以始凡起廢籍務核生平果能矯矯錚錚始終一節宏才潔操炳著寰中者亟與登庸其有才品碌碌無奇而穢態班班可考者竟不妨終老投閑毋以起廢之美名而辱於敗羣之宵輩也一曰升遷之不可不漸也魏崔之世

惟賄是聞故或一歲而九遷或一歲而三遷官保麟玉唾手可致  
京堂開府拾芥非難今者清明再闢威福上操且皇上惓惓於久  
任之規所以抑躁競之人心修本等之職業臣愚以爲自今以始  
凡有升遷一循資俸卽如選郎往年六選始陞太常少卿今且四  
選或三選矣清卿之陞開府亦須兩年三年今則一載或半載矣  
惟其爭缺者多則遷轉不容不速惟其遷轉太速則指摘不容不  
生職守愈墮名器轉褻何如受之以需循資漸進執秩者旣無破  
格之謂受爵者亦無速化之嫌且得并其精神競功營職其爲利  
益固非小也一曰會推之不可不慎也往日會推大僚率憑選司  
張主卽九卿科道官不過臨期受成事而已中間或以資緣而入  
單或以講嚶而得缺或以資俸而挨及種種不一豈能一一盡孚  
輿望無怪乎今日會推而明日掛彈文也日者自皇上申諭銓臣

乾坤正氣集

卷五百五十七

六

以後兩番會推遂覺精采一新自今以後謂宜于會議半月之前  
九卿科道務秉虛公各舉所知或被擢濁世或高尚林泉或養俸  
清卿或宣猷藩臬孰才略可任邊疆孰品望宜居風紀孰精心國  
計可備度支孰綜覈人材堪登銓軸相地擇人因人授缺務使廢  
籍中居其二見任者居其一而後人心始平公論始快也一曰媚  
璫之不可不分也夫人立身止此名節或以官評之劣受黜考功  
或以一節之差見擯有道皆可節說自解獨至媚璫而終身不可  
對鄉閭醜莫甚矣然就中亦有數等未可一概而同試就六七年  
章疏約略言之有純乎阿奉爲心尋題取媚無所不極其醜者有  
職掌所係騎虎勢成不得不從衆爲之者有一人而一二疏有一  
人而二十三疏者有一疏中原因陳奏他事而帶諛幾語者有一  
疏中帶諛幾語而稱頌無等情不容寬者有雖涉稱頌而詞意淡

薄僅取塞白以免誅求于一時者諸如此類情之輕重罪之大小卽此攸分臣愚謂皇上宜將一切紅本盡數發出著九卿科道從公查勘某情屬可恕某情實難寬因其稱頌之多少濃淡而差等罪之或削奪或開住或準其自陳姑養廉恥或免其追究策勵供職則天下始曉然于聖主之無苛政無逸罰而寬實諸臣益洗心滌腸圖收桑榆之效矣不然聽其引退知待何時而且使見在供職者未免有徬徨疑慮之心豈皇上嘉與維新之意乎一日論人之不可不審也觸邪指佞自是言官職掌風聞之事豈必盡眞然凡人生平各有本末鄉評官評兩者參之思過半矣苟其事涉風影漫肆抨彈在被言者卽不任受而旁人豈能一一盡知其詳竟以莫須之案而成不洗之愆矣夫一官之褫奪所係猶輕而一生之名節所關實大此亦培養士氣之一端也至于章奏數陳亦自

乾坤正氣集

卷五百五十七

九

有體鄙俚穢褻之語豈可入告于君父之前近見言官論人動輒罵詈相加竟同市井溷談有類訟師口角夫就人論人就事論事據實參駁彼自無解要卽于糾彈之內原不失馴雅之規何必逞臆恣吻褻瀆聖聽此臣願諸臣以論人者而還愛人以重朝廷者而還自重也一日諡典之不可不嚴也朝廷爵賞止榮一身易名之典直光千禩古來諡法美惡並存今則有美而無惡矣此必品節志行助勞事業確宜表章然後一字之褒聲施後世今者徒徇情面惟憑輿援始則求政府之票擬繼則求祠部之部覆有力則得門而入何問公論之諧人冷則高閣置之誰洗幽芳之色如原任刑部尙書王紀孤忠勁節壁立千秋爲儀郎則力爭代藩爲司寇則力攻客魏力逐奸輔沈淮竟削籍坎壈以死至今未有言及易名之事者而庸庸碌碌醜惡養奸之方從哲有何功德亟與之

諡而且加之先朝清正之褒是則無人不可諡而將來媚璫諸輔亦思預爲身後之圖矣臣愚以爲自今以後凡故官子孫陳乞諡典者必科道宜詳加確覈果係輿論僉同禮曹始得據以具覆斷不可以朝廷異典殊旌爲市恩徇情之具也一日刑章之不可不飭也往者魏崔之世凡觸兇網卽煩緹騎一屬緹逮卽下鎮撫魂飛湯火慘毒難言苟得一送法司便不啻天堂之樂矣今者湯網從寬數輩奸賊法止于撫按之解訊卽就獄亦止于廷尉之鞫審耳乃遷延故里日復一日不論遠近杳然未聞檻車之來豈五虎五彪戮其首遂可寬其餘而不妨徐徐結局耶傳聞劉志選欲爲自盡之計曹欽程且曾削髮而逃如此窮兇不亟正法如衆憤何臣以爲宜嚴催各該撫按速行提解蚤結前局至于李實等見行會審自應追究主使無寬首惡之誅劉詔就繫多時何不蚤定爰

乾坤正氣集

卷五百五十七

三

書還以應得之罪此皆今日挽天心快人心之急著也以上數款雖自知平常無奇然爲國家惜名器別眞才養士氣慎旌賞飭刑罰皆今日第一吃緊若果實見諸行事則清明整肅之象自成而躁競紛囂之端自息是非迥判情法無畸平康之理立見于今矣伏惟皇上採擇敕部施行世道幸甚臣無任悚息待命之至

佐邊儲疏

題敬因處餉之艱難聊竭千慮之一得仰祈聖明採擇施行以裕國計以佐邊儲事臣惟天下所最急者無如兵與民二事而生財之道不講則有兵而不得兵之用有民而不安民之生雖聖王無以成內順外威之治也伏見我皇上初登大位卽孜孜以兵弱民困宣諭羣臣邇因邊警告急請帑紛紛召對平臺屢屢聖慮臣忝列戶垣財用盈詘實關職掌臣卽愚昧無知敢不勉效涓埃以佐

計臣之萬一臣考祖宗朝軍旅四出而無糧餉不足之患大端惟屯田鹽法徵解芻糧本色諸政今事事壞盡糧餉何由而足高皇帝屯田之制每軍種田五十畝多至一百畝少至二十畝大約以少壯者守城老弱者耕種以故沿邊軍士皆自爲身家妻子之謀不待趣之死敵而自然肯戰卽少壯之人其操演之餘又得以其筋力用盡于農畝所以地之出者既多而軍之居于邊者亦爲久長之計而無所怨苦今之飢軍皆嗷嗷焉聚烏合之衆曾無朝夕之謀豈能臨敵而戰乎臣謂屯事雖壞祖宗之遺制未嘗不在但行之須以其人旣得其人又須久任或責以十年二十年使其行之而效卽終身經理屯事未爲不可臣子以身許國何事不可爲果能爲國家幹辦一事一生精神透露卽可不朽豈必擇其逸者榮者而爲之乎今沿邊關外空地最多亟宜訪實心任事暢曉農

乾坤正氣集

卷五十五十七

三

事之大臣招集遼東無食無家之百姓開闢荒田計本年之工本其收成約略可以相當而二年三年之後粒粒皆子息矣夫以本地之糧餉本地之軍而不必借糧于千里之外以本地之兵守本地之土而不必調兵于萬里之外直以關門兵食付託于經理之臣而天子不與其憂計無便于此者但無從中格之俾得盡展其所長何憂屯政之不行也然屯政之行須俟之二年三年乃徐有成效而目前未可以濟急至于鹽法一事祖宗朝原爲邊儲而設商賈輸粟塞下以易引所以塞下之粟常充而又恐商賈苦于輸將令其自擇官地任其耕種以出粟所以商賈之輸粟又甚便夫邊上之粟常充則米價不騰貴商賈耕闢于塞上則物力又充饒此祖制之最善者禍起于賊臣輩欲折色以便侵漁而壞屯鹽之政嘉靖八年猶議準各邊關中引鹽仍召商納本色糧草不許折

納銀兩其商人自出財力開耕邊地上納引鹽者聽載在會典可  
考也惜行之不力而商人習于輸銀終不果行今何不敕下戶部  
酌議當年何以本色可行後來何以難行務要酌古準今求一確  
然可行之法俾商賈樂于趨事而邊上之粟自饒豈不長便乃日  
狃于成習而不思爲變通之計乎事例一途原有戶七工三之說  
不知戶部事例從來已久昔年止以三殿之災爲工部所分今三  
殿告成矣豈容久假不歸卽云有陵工城工及硝磺器械等費工  
例原不可徑裁然一其收納于戶部而屬有急需從戶支給此固  
無不便者臣愚謂宜專設一大臣督理事例而于司屬中擇其明  
敏才幹者一二人一應收支出入悉以委之凡係邊儲告急卽以  
此爲接濟絲毫登入簿冊年終總一清銷頭緒旣專人心自一將  
見趨納恐後而一年之所入亦自不貲矣其各省直兩三年中納

乾坤正氣集

卷五十五十七

三

過工遼生銀有解部者有納銀在官而未經起解尚存畱于地方  
者悉應行文各該撫按著落各州縣盡數清查速行解到毋以朝  
廷不得已之例銀等之民間稅契銀兩而任意支銷邊疆反不得  
資其實用也太倉支放原有額數自逆璫專擅任意增加以致濫  
支日多額支日虧而錦衣爲甚今則不能復國初之制而萬歷年  
間成額犂然備也但一查復十年前之定額而濫增者議裁歲不  
可省數十萬乎其邊方武弁冒濫者多如撫院有標下中軍矣而  
又有旂鼓又有撫夷等官兵備司各設中軍初不過爲武流疏通  
之計此輩旣係欽依則薪紅等費自不能不與額設守備一體支  
領夫孰非取給于正餉者乎今若一概裁去所省便自不貲而裁  
之之法先禁其冒支薪紅等項并養廉等名目及隨任家丁等項  
姑令効勞待俸及期陞轉遺下員缺兵部不得再補查照先年事

例于本鎮衛所指揮千戶內該道詳請督撫批委如此則于事不廢于人更得于餉大省矣又如邊方督撫按鎮閱操及撫夷按臨陞任等事官軍各有賞賚先年充裕不以爲苦近年各邊匱乏情同賞無正項又難姑待每借正餉充支名曰候補其實無補期也爲數雖云無幾各邊亦非盡然然時詘不得舉贏諒各撫按亦有同心但官軍胥認爲固然地方官實難以驟革若非藉明目嚴禁則成例又豈能一朝輕破乎至于新舊餉管理斷宜合不宜分蓋新餉舊餉兩項俱屬匱乏乃兩郎中分管因而各自爲見新餉到則管新餉者急欲發之懼遲則爲舊餉所那借也舊餉到則管舊餉者急欲發之懼遲則爲新餉所那借也因而懼堂官存留不發則不以庫存實數報堂官者有之此新舊兩庫所以到底如洗耳譬猶理家者兄弟異心各私其賞而主翁失其主持之權矣無如

乾坤正氣集

卷五十七

三

新餉舊餉總責于成一官管理冊庫者一官蓋冊庫煩瑣亦足役一人全副精神也至于兩庫仍兩員分管則分分合合悉得其竅而錢穀之出孔亦可爲少節矣已上數款生者三節者亦三生與節之人居其一大約皆復舊而非創新若循此而行歲亦可得數百萬而邊餉缺額何難立補哉日來在廷諸臣凜凜焉懼司農無點丹之術外解又不至夫外解之不至亦有故焉凡錢糧徵解如期大抵皆正印官身在地方又迫于考成之功令自不得不著意于催科也自去年九十月間各官以覲事離任考選者既題問京師而回任者又遷延故里代庖佐貳自愛者意在潔身徵收之事不欲嚴比卽問有徵收而起解或不如法仍無濟事一或心存不肖便爲吏胥所蒙竟有東京邊于高閣祇發不急之工食以遂其毘飲之計而全不顧公家之急者此司農之所以益仰屋也

伏乞敕下吏部凡今年新選甲科正官蚤給文憑刻期勒令赴任  
其有晝錦逍遙以違限參治新發之劓未有不爲地方計長久無  
論民困稍甦而正供亦得以速解此亦近日安民足食之要著也  
臣蒿目時艱愧無長策輒據狂瞽之一得以備當事採擇如此惟  
皇上留神省覽立敕該部具覆施行臣無任激切悚仄待命之至

亟修戰守疏

奏爲狡口挾賞無厭恃款大非長策懇乞聖明嚴敕中外亟修戰  
守揀用實心任事之人以毋誤封疆事職觀插首虎視宣大亦既  
數月矣其桀驁魚然之狀令人髮指封疆大吏一則曰講警再則  
曰講折迄不聞一言及于戰守者職竊痛之蓋自俺答受款以來  
文武將吏全不言兵惟知賸削軍脂半以媚口半以潤橐偷旦夕  
之安以俟瓜期之代城垣之修濬弗問也墩堡之傾圮弗顧也器

乾坤正氣集

卷五十五

五

械衣甲之朽爛弗計也尺籍隊伍之虛冒弗理也馴至今日而養  
癰已潰不可收拾矣謂宜亟反前日之誤大修戰守之防口入則  
完守入堡堅壁清野以待之口出則出奇設伏邀其惰歸以擊之  
口求款吾亦姑爲講以延之口不求款吾亦故爲緩以釣之庶乎  
可耳而奈何有爲顯官款口之說者彼豈謂款之真可恃耶夫款  
而第令邊臣相機講警乘時修補未爲非是若遂設官而號于天  
下曰款口也其與夫遣使求和者何以異堂堂天朝可有此舉動  
乎然此猶以大體言也職聞言兵者攻非特攻其城而已也必有  
攻其心之道焉守非特守吾地而已也必有守吾氣之道焉今皇  
皇焉惟款之是求敵之氣日以倣能攻其心乎吾之氣日以靡能  
守吾氣乎攻與守一無可恃口何憚而就我款乎然此猶以兵機  
言也卽使口果就款或索我以昔薊之賞若干或索我以今卜索

之賞若干或索我以累年之欠若干將一一聽之歟恐太倉無此百餘萬之長物也且口亦何厭之有彼利我款入之金錢有數而利我入犯之攫獲無窮今年飽而颺去明年安保不來是口之不能以款結局已甚彰明矣然則如何而始爲制勝之長策乎惟有修邊牆墩堡以固守教練士卒以待戰任用能戰能守之人以待敵之來而已職考大同長邊幾六百里修之誠不易然有一處之殘缺口卽生一處之垂涎必當責成撫道實實修整雖一時有工築之費而金湯可恃潛消口人窺伺之心其隱利無窮與輦金輸口付于不可問詰之地者不相去萬萬乎至口騎突如而來專恃完守入保迨其去也則情歸可擊然烽火不明而徒聽夜不收之口稟及回鄉漢人之稍信則雖欲入保其將能乎宣大自款成五十年內地不習兵火軍民散處積聚星落烟墩戍卒頽廢蕩然故

乾坤正氣集

卷五五十七

五

口一入其多寡不可問也其方向不可知也卽有塘報而人與口俱馳奔潰擁踏殺戮盈野婦女牲畜滿載以去其倖免者止一空城耳故明烽火之法宜于沿邊舊臺堡盡心整齊中空外堅結以純磚環以深池如中原保家樓之製近門之角峙以磚屋數口中積糗糧火器可備十日者戍卒五名或十名常川在臺卽以爲家經年更不離臺凡舉放方向之規平時預先講習口或聲息近邊頃刻間數百里皆知其傳報分明與來而失報報而參錯者務重其賞罰以期必信而後完守入保之事可行也至內地屯堡宜各擇其險要可據道理相接者如六十里爲中則四面小堡相去各二三十里修濬濠塹儲其火器貯其積聚凡共守此堡者各籍其姓名家口預定住址平居不妨寄居小堡隨便耕牧烽傳則羣歸大堡協力拒堵兩者相應口自不敢輕入入亦無所標掠不出三

日勢必飢疲散歸然後以逸待勞以飽待饑尾而擊之未有不可得志也乃若強兵之法則調遠兵之糜兵而先苦于餉之難增募新兵之糜餉而仍不得兵之實用往事昭然計唯有就兩鎮之兵速行簡練每鎮額定之餉按期先發得其堪戰者隨練隨賞相其老弱者隨練隨汰視其缺伍者隨補隨練以簡練默行其綜覈而兵可清以簡練徐行其招補而兵可實以簡練甄拔其精勇而兵可強至於畿輔肘腋之地如順永等府屬邑尤宜亟練民兵以爲保障本地有警則人人自可戰守都關有警則處處得其應援第簡練之人殊不易得必其老于矢石親歷戰陣知行伍之弊竇識士卒之甘苦者而後克勝此設有見任貴寧道參政胡平表當著首遣樊龍張彤等叛據重慶大小文武殺戮一空官竄民逃平表乃縋城而下急走石柱乞兵又集川東少年練爲士卒節制土司

乾坤正氣集

卷五百五十七

五

消弭反側凡舟馬芻糧營壘矢石一手幹辦竟能保川東復西北解成都下重慶至搗巢之役率五六千士卒破奢安烏鎮四夷十萬衆遂取永寧掃蘭州畢節而還雖爲文臣然古之名將不能過也職每思其人以當插口惜遠在萬里之外今適以入賀來京師似不當舍之而去且見蒙皇上錄敘川功準加二級超陞大用何不卽以邊道加銜太僕寺卿使得專任練兵俟其定插之後論功陞秩聽該部酌議上請卽云貴陽之局未結然西北之事此日較急于西南料當事者不煩再計而決也至宣大邊疆之任燃眉之際非異才不可猝辦則有原任僉事劉永基雄才電發機略淵沉爲宜與縣令三月之間大盜悉除迨後服闋補江西贛縣適將官尅削營兵喧亂各官杜門禍在不測永基疋馬自詣亂營諭以大義亂兵謂永基曰縣官來署營事當不復反永基權宜以應之我

行軍事各遵法一鼓而各站信地堂上肅然再鼓而散兵回營止于亂賊中縛渠魁斬三人耳使永基平日撫字不孚信義不著百姓猶當生心況乎其不屬縣事之營軍肯俯首聽其約束也今永基見補陝西洮岷道僉事似當借其才用于最急之處以得其一臂之用職又見年來公私殫竭尾閭難塞養一兵須得一兵之用製一器須有一器之益而惟得用兵用器之人然後兵無空糜器不虛造則有原任職方司郎中方孔照清介絕塵嚴明執法以年來兵事壞于逃將首參逃將王威侯世祿等明觸魏賊之怒而不顧也武官非有軍功不帶府銜魏賊市恩債帥以結其心濫與府銜孔照力爭之內璫與武事古來大害魏賊欲以都督之蔭開坐府之例孔照又爭之至崔呈秀欲越陞其弟崔凝秀孔照又故違之遂因推陞江西備兵畱中不下而復削職于告病之後今公

乾坤正氣集

卷吾莘七

七

論旣明業奉卽與起用之旨職謂孔照當逆徵薰天之日尙能毅然執法忤觸兇鋒以其風力立于邊關必能破請託虛冒之情面爲疆場幹辦實事無疑也又有戶部郎中呂一奏初管崇文稅課正璫黨用事之時以疆項不受徐大化囑託致被大化誣劾以去及璫敗始還今官此其大節可見矣而職又稔知其爲人明習天文曉暢兵事今督儲薊門聞其部署精整造戰車輕便而有法亦邊才之卓然者也合無因其駕輕就熟卽授以薊門一道之任以試其能而後乃大用之乎昔我高皇帝時元也速侵通州曹良臣以千人卻其萬騎比其空國以來而常遇春李文忠直追至北河斬其大將得軍士萬人車馬皆以萬計夫賊衆我寡然能勝之者以我無畏彼之心耳兵家之事我愈畏則愈敗彼愈不畏則愈勝職所言修邊牆明烽火以固守教練士卒以待戰而慎選實心任

事之臣以嚴戰守之具皆非言款也而受款之機未嘗不在焉何也口見我以牆堡則固以戰士則強以邊政則嚴明知我之可以無款也來而無所獲則俛首而就小利耳千古禦口之法多不出此伏惟皇上裁擇施行職無任悚仄待命之至

乾坤正氣集

卷五十七

天

09972

